

摘藻堂四庫全書薈要

集部

欽定四庫全書薈要

御選歷代詩餘卷五十七目錄

起九十四字  
至九十五字

六么令

晏幾道 三首

柳永

賀鑄

周邦彥

辛棄疾 二首

方千里

吳文英

周密  
二首

陳允平

李琳

玉漏遲  
又一體

宋祁

程垓

吳文英 二首

周密

張炎

何夢桂

元好問

劉因

張翥

白樸

張埜

劉基

無名氏

尾犯

秦觀

趙以夫

吳文英

滿江紅 又一體

杜衍

前調 又一體

蘇軾 二首

李嬰

前調 又一體

辛棄疾

前調 又一體

趙鼎

李昉英

應天長 又一體

柳永

葉夢得

無名氏

漢宮春

彭元遜

金浮圖

尹鷄

傾杯樂

柳永

留客住

周邦彥

淒涼犯 又一體

張炎 二首

露華 又一體



王沂孫

張炎

雪明鳩鵲夜

宋徽宗

天香

毛滂

步月

施岳

玉連環 又一體

馮艾子

徵招

彭元遜

一枝春

周密 二首

張炎

張翥

無名氏

江南好 又一體

吳文英

雪梅香

柳永

惜秋華 又一體

吳文英

芙蓉月

趙以夫

古香慢

吳文英

紅情

柳永

掃花遊

又一體

周邦彥

楊无咎

方千里

楊澤民

吳文英  
五首

陳允平

王沂孫  
三首

張炎  
二首

張翥

邵亨貞

張半湖

御選歷代詩餘卷五十七目錄

欽定四庫全書薈要卷二萬七百三十五

集部

御選歷代詩餘卷五十七

起九十四字  
至九十五字

六么令

一名綠腰一名錄要一名樂世雙調九十四字楊慎謂義取六博么即鼻也按碧雞漫志載六么名綠腰吐番傳曰奏涼州六么雜曲琵琶錄曰綠腰本錄要也樂工進曲令錄其要者唐人詩琵琶先採六么頭遠巡彈得六么微六么水調家家唱宋人詞亦云六么催拍蓋類傳貪看六么花十八皆於楊慎說無涉也

六么令

晏幾道



綠陰春盡飛絮遠香閣晚來翠眉宮樣巧把遠山學一  
寸狂心未說已向橫波覺畫簾遮匝新翻曲妙暗許閒  
人帶偷掐 前度書多隱語意淺愁難荅昨夜詩有回  
文韻險還慵押都待笙歌散了記取留時霎不消紅蠟  
閒雲歸後月在庭花舊闌角

前調

晏幾道

雪殘風信悠陽春消息天涯倚樓新恨楊柳幾絲碧還  
是南雲鴈少錦字無端的寶釵瑤席彩絃聲裏拚作尊

前未歸客 遙想疎梅此際月底香英折別後誰遠前  
溪手揀繁枝摘莫道傷高恨遠付與臨風笛儘堪愁寂  
花時往事更有多情箇人憶

前調

晏幾道

日高春睡喚起嬾妝束年年花落時候慣得春眠足學  
唱宮梅便好更暝銀笙逐黛蛾低綠堪教一恨却似江  
南舊時曲 常記東樓夜雪翠幙遮紅燭還是芳酒杯  
中一醉光陰促曾笑陽臺夢短無計憐香玉此歡難續

乞求歌罷借取歸雲畫堂宿

前調

柳永

澹煙殘照搖曳溪光碧溪邊淺桃深杏迤邐探春色昨夜扁舟泊處枕簟當灘磧波聲漁笛驚回好夢夢裏欲歸歸不得展轉翻成無寐因此傷行役思念多媚多嬌咫尺千山隔都為深情密愛不忍輕離拆好天良夕鴛幃寂靜算得也應暗思憶

前調

賀鑄

夢雲蕭散簾捲畫堂曉殘熏畫蠟隱映綺席金壺倒塵  
送行鞭裊裊醉指長安道波平天渺蘭舟欲上回首離  
愁滿芳草已恨歸期不早枉負狂年少無奈風月多  
情此去應相笑心記新聲縹緲翻足相思調明年春早  
宛溪楊柳依舊青青為誰好

前調 重陽

周邦彥

快風收雨亭館清殘燠池光靜橫秋影岸柳如新沐聞  
道宜城酒美昨日新醅熟輕鑣相逐衝泥策馬來折東

籬半開菊 華堂花豔對列一一驚郎目歌韻巧共泉  
聲間雜琤瑤玉惆悵周郎已老莫唱當時曲幽歡難卜  
明年誰健更把茱萸再三囑

前調

送陸德隆  
侍親東歸

辛棄疾

酒羣花隊攀得短轅折誰憐故山歸夢千里尊羹滑便  
整松江一棹檢點能言鴨故人欲接醉懷霜橘墮地金  
圓醒時覺 長喜劉郎馬上肯聽詩書說誰對叔子風  
流直把曹劉壓更看君侯事業不負平生學離腸愁怯

送君歸後細寫茶經煮香雪

前調

用前韻

辛棄疾

倒冠一笑華髮玉簪折陽關自來淒斷却怪歌聲滑放  
浪兒童歸舍莫惱比鄰鳴水連山接看君歸興如醉中  
醒夢中覺江上吳儂問我一一煩君說忍使尊酒頻  
空賸欠珍珠壓手把漁竿未穩長向滄浪學問愁誰怯  
可堪楊柳先作東風滿城雪

前調

方千里

照人明豔肌雪消繁燠嬌雲慢垂柔領紺髮濃於沐微  
暈紅潮一線拂向桃腮熟羣芳難逐天香國豔恰比春  
蘭共秋菊 當時相見恨晚彼此縈心目別後空憶仙  
姿路隔吹簫玉何處闌干十二縹緲陽臺曲佳期重卜  
都將離恨拚與尊前細留囑

前調

七夕

吳文英

露蛩初響機杼還催織婺星為情慵嬾竚立明河側不  
見津頭艇子望絕南飛翼雲梁千尺塵緣一點回首西

風又陳迹 那知天上計拙乞巧樓南北瓜果幾度淒涼寂寞羅池客人自回廊縹緲誰見金釵擘今夕何夕杯殘月墮但耿銀河橫天碧

前調雪

周密

癡雲翦素檐滴夜深悄銀城飛捷翠隴占瑞豐年報白戰清吟未了寒鵲爭枝曉鶴迷華表山陰醉卧今日何人問安道 交映虛窓淨沼不許遊塵到誰念絮帽茸裘歎幼安今老玉鑑修眉未掃白雪詞新草冰蟾光皎



梅心香動閒看春風上瓊島

前調 春雪

周 密

迴風帶雨凍蕊漏聲悄小窓照影虛白幾悞鄰雞報  
千樹天桃綻了鵲立通明曉眼空八表宮袍帶月醉裏應  
迷灞陵道 風靜瓊林翠沼片片隨春到吟鞦十里新  
堤怪四山青老玉唾珠塵怕埽句冷池塘草白天寒皎  
飛瓊何在夢覺梨雲度仙島

前調 重陽

陳允平

授衣時節猶未定寒燠長空雨收雲霽湛碧秋容沐還  
是鱸肥蟹美橡栗村村熟不堪追逐龍山夢遠惆悵田  
園自黃菊 醉中還念倦旅觸景傷心目羞破帽把茱  
萸更憶尊前玉愁立梧桐影下月轉迴廊曲歸期將卜  
西風吹鴈嬾寄斜封但相囑

前調

京中  
清明

李琳

澹煙疎雨香徑渺啼鴉新晴畫簾閒捲燕外寒猶力依  
約天涯芳草染得春風碧人間陳迹斜陽今古幾縷遊

絲趁飛蝶 却向尊前起舞又覺春如客翠袖折取嬌  
紅笑與簪華髮回首青山一點檐外寒雲疊梨花著雨  
柳花飛絮夢繞闌干一株雪

玉漏遲

又一體雙調  
九十四字

玉漏遲

宋 祁

杏香消散盡須知自昔都門春早燕子來時繡陌亂鋪  
芳草蕙圃妖桃過雨弄笑臉紅篩碧沼深院悄綠楊巷

陌鶯聲爭巧 早是賦得多情更遇酒臨花鎮辜歡笑  
數曲闌干故國謾勞凝眺漢外微雲盡處亂峰鎖一竿  
殘照問琅玕東風風淚零多少

前調

程垓

一春渾不見那堪又是花飛時節忍對危闌數曲暮雲  
千疊門外星星柳眼看誰是當時風月愁萬結憑誰為  
我殷勤低說 不是慣却春心奈新燕傳情舊鶯饒舌  
冷篆餘香莫放等閒消歇縱使繁紅褪盡猶自有酴醿

堪折魂夢切不耐飛來蝴蝶

前調

吳文英

絮花寒食路晴絲罨日綠陰吹霧客帽欺風愁滿畫船  
煙浦綠挂秋千散後悵塵鎖燕簾鶯戶從間阻夢雲無  
準鬢霜如許夜久繡閣藏嬌記掩扇傳歌翦燈留語  
月約星期細把花鬢頻數彈指一襟怨恨漫空倩啼鵲  
聲訴深院宇黃昏杏花微雨

前調 中秋

吳文英

鴈邊風信小飛瓊望杳碧雲先晚露冷闌干定怯藕絲  
冰腕淨洗浮雲片玉勝花影春燈相亂秦鏡滿素娥未  
肯分秋一半 每圓處即良宵甚此夕偏饒對歌臨怨  
萬里嬋娟幾許霧屏雲幔孤兔淒涼照水曉風起銀河  
西轉摩淚眼瑤臺夢回人遠

前調

題吳夢窓霜  
花腴詞集

周 密

老來歡意少錦鯨騎去紫簫聲杳怕展金匳依舊故人  
懷抱猶想烏絲醉墨驚醉語香紅圍繞閒自笑與君共

是承平年少 雨窓夢短難憑是幾度宮商幾番吟嘯  
淚眼東風回首四橋煙草載酒倦遊何處已換却花間  
啼鳥春恨悄天涯暮雲殘照

前調

張炎

竹多塵自埽幽通徑曲禪房深窈空翠吹衣坐對閒雲  
舒嘯寒木猶懸故葉又過了一番殘照經院悄詩夢正  
迷獨憐衰草 幽趣盡屬閒僧渾未識人間落花啼鳥  
呼酒凭高莫問四愁三笑可惜秦山晉水甚却向此時

登眺清致少那更好游人老

前調 梅

何夢桂

問春先開未江南野水得春初小獨殿羣芳卻道花前  
開早長苦冰霜壓盡更說甚風標清窈些子好孤香冷  
豔有誰知道 年年吹落還開聽畫角樓頭送他昏曉  
何處玉堂滿地蒼苔不埽誰是肝腸鐵石與共說歲寒  
懷抱花未老無奈酒闌情好

前調

元好問



浙江歸路香西南却羨投林高鳥升斗微官世累苦相  
縈繞不如麒麟畫裏又不與巢由同調時自笑虛名負  
我平生吟嘯擾擾馬足車塵被歲月無情暗消年少  
鐘鼎山林一事幾時曾了四壁秋蟲夜雨更一點殘燈  
斜照清鏡曉白髮又添多少

前調

泛舟  
東溪

劉因

故園平似掌人生何必武陵溪上三尺蓑衣遮斷紅塵  
千丈不似東山高卧也不似鹿門長往君試望遠山顰

處白雲無恙 且唱一曲漁歌當無復當年缺壺悲壯  
老境羲皇換盡平生豪爽天設四時佳興要留待幽人  
清賞花又放滿意一篙春浪

前調

春日  
有懷

張翥

病懷因酒惱依稀夢裏吳娃嬌小金縷歌殘人去月斜  
雲杳怕見棲香燕晚又怕聽啼花鶯曉庭院悄生衣欲  
試風寒猶峭 窈窕青粉牆低送影過秋千驀然間笑  
半朶棠梨微露鳳釵紅媚近日琴心倦寫更遠信西沈

青鳥虛負了花月一春多少

前調

白樸

碧梧深院悄清明過也秋千闌了楊柳陰中又是一番  
啼鳥人去瑤臺路遠辜負却花前歡笑音信杳西樓盡  
日凭闌凝眺縹緲霧閣雲窓恨夢斷青鸞夜深寒峭  
檐玉敲殘捱得五更風小麝炷金猊燼冷畫燭短銀屏  
空照芳徑曉惆悵落紅多少

前調

張堊

桂香浮綠酒持杯邀月何殊佳友欲寫秋光鈍筆近來  
如帚空對珠宮貝闕恍夜色明於晴晝休憶舊人情節  
意年年同否浪走紫陌紅塵笑底用腰間印金懸斗  
鷺約鷗盟江上怪余應久便有挈雲手在向此夕何妨  
深袖沈醉後忘却鏡中白首

前調

初夏

劉基

海榴花似火看看又見麥秋時候枝上鳴蜩斷續一庭  
金奏翠沼風漪未定看葉底明珠圓溜苔徑黝鰕鬚掛

處有人消瘦 緬想那日歡娛是鴻鴈來初芙蓉開後  
蔓草青蕪但覺暗愁依舊欲把相思寄與霧煙慘不堪  
回首凝望久寒鴉自啼疎柳

前調

無名氏

驚鴉翻暗葉桐花墜露曲房新曉蠟炬香籠準備惜花  
起早翠沼微晴水活呵素手襯妝初了香徑小溶溶波  
暖正宜臨眺 誰信造物無私偏付與容華稱頰宜笑  
更況花朝日日霽多陰少不惜千金費盡但惜取數峰

殘照歸騎香縱醉可眠芳草

尾犯

一名碧芙蓉雙

調九十四字

尾犯 九日

秦觀

客裏遇重陽孤館一杯聊賞佳節日暖天晴喜秋光清  
絕霜乍降寒山凝紫霧初消澱潭皎潔闌干閒倚庭院  
無人顛倒飄黃葉故園當此際遙想弟兄羅列攜酒  
登高把茱萸簪徹歎籠鳥羈蹤難去望征鴻歸心漫切

長吟抱膝就中深意憑誰說

前調 九日

趙以夫

長嘯躡高寒回首萬山空翠零亂縹緲清秋與斜陽天  
遠引光祿清吟興動憶龍山舊游夢斷袂衣初試破帽  
多情自笑霜蓬短 黃花長好在俛仰節物驚換紫蟹  
青橙覓東籬幽伴感今古風淒霜冷想闕河煙昏月澹  
舉杯相屬殷勤更把茱萸看

前調 贈浪翁重  
客吳門

吳文英

翠被落紅妝流水膩香猶共吳越十載江楓冷霜波成  
纈燈院靚涼花乍翦桂園深幽香旋折醉雲吹散晚樹  
細蟬時替離歌咽長亭曾送客偷賦錦鴈留別淚接  
孤城渺平蕪煙闊半菱鏡青門重售採香堤秋蘭共結  
故人憔悴遠夢越來溪畔月

滿江紅

又一體雙調  
九十四字

滿江紅  
退寓  
南都

杜  
衍



無名無利無榮無辱無煩無惱夜燈前獨歌獨酌獨吟  
獨笑又值羣山初雪滿又兼明月交光好便假饒百歲  
擬如何從他老 知富貴誰能保知功業何時了算箠  
瓢金玉所爭多少一瞬光陰何足道但思行樂常須早  
待春來攜酒殢東風眠芳草

前調

又一體

蘇軾

憂喜相尋風雨過一江春綠巫峽夢至今空有亂山屏  
簇何似伯鸞攜德耀箠瓢未礙清歡足漸燦然光彩照

階庭生蘭玉 幽夢裏傳心曲腸斷處憑他續文君壻  
知否笑君卑辱君不見周南歌漢廣天教夫子休喬木  
便相將左手抱琴書雲間宿

前調

東武會  
流杯亭

蘇軾

東武南城新堤固漣漪初溢隱隱徧長林高阜卧紅堆  
碧枝上殘花吹盡也與君更向江頭覓問向前猶有幾  
多春三之一 官裏事何時畢風雨外無多日相將泛  
曲水滿城爭出君不見蘭亭修禊事當時座上皆豪逸

到如今修竹滿山陰空陳迹

前調

黃州上東坡

李嬰

荆楚風煙寂寞近中秋時候露下冷蘭英將謝葦花初  
秀歸燕殷勤辭巷陌鳴蛩淒楚來窻牖又誰念江邊有  
神仙飄零久橫琴膝攜筇手曠望眼間吟口抵紛紛  
萬事到頭何有君不見凌煙冠劍客何人氣貌長依舊  
歸去來一曲為君吟為君壽

前調

又一體

辛棄疾

點火櫻桃照一架  
荼蘼如雪春正好  
見龍孫穿破紫苔  
蒼壁乳燕引雛飛  
力弱流鶯喚友嬌  
聲怯問春歸不肯  
帶愁歸腸千結  
層樓望春山疊  
家何在煙波隔把古  
今遺恨向他誰說  
蝴蝶不傳千里夢  
子規叫斷三更月  
聽聲聲枕上勸人歸  
歸難得

前調

又一體

趙鼎

慘結秋陰西風送  
絲絲雨濕凝望眼  
征鴻幾字暮投沙  
磧欲向鄉關何處  
是水雲浩蕩連南  
北但修眉一抹有

無中遙山色 天涯路江上客腸已斷頭應白空搔首  
興歎暮年離隔欲待忘憂除是酒奈酒行有盡愁無極  
便挽將江水入尊罍澆胸臆

前調

江西持憲  
筭登高作

李昴英

薄冷催霜碧空豁飛鴻斜度恰九日御風絕頂下看塵  
宇滕閣芳筵牋筆妙龍山勝餞旌旗駐料山靈也要可  
人遊成佳趣 吹帽墮羞千古題糕字非吾侶却坐間  
著得煮茶桑苧萬里寒雲迷北斗望遠峰夕照頰西顛

且滿浮大白送黃花  
劍休舞

應天長

又一體雙調九十  
四字或多慢字

應天長

柳永

殘蟬聲漸絕  
傍碧砌修梧敗葉微  
脫風露淒清正是登  
高時節東籬霜乍結  
綻金蕊嫩香堪折  
聚宴處落帽風流未饒前  
拈把酒與君說  
恁好景良辰怎忍虛設  
休效牛山空對江天凝  
咽塵勞無暫歇  
遇良會剝偷懽悅

歌未闋杯興方濃莫便中輟

前調

自潁上  
縣還

葉夢得

松陵秋已老正柳岸田家酒醅初熟鱸膾蓴羹萬里水  
天相續扁舟臨浩渺寄一葉暮濤吞沃青筠笠西塞山  
前自翻新曲來往未應足便細雨斜風有誰拘束陶  
寫中年何待更須絲竹鴟夷千古意算入手比來尤速  
最好是千點雲峰半篙澗綠

前調

無名氏

雕鞍成謾駐望斷也不歸院深天暮倚徧舊日曾共凭  
肩門戶踏青何處所想醉拍春衫歌舞征旆舉一步紅  
塵一步回顧行行愁獨語想媚容今宵怨郎不住來  
為相思却又空將愁去人生無定據歎後會不知何處  
愁萬縷憑仗東風和淚吹與

漢宮春

雙調九

十四字

漢宮春 元夕

彭元遜



十日春風又一番調弄怕暖愁陰夜來風雨搖得楊柳  
黃深熏篝未斷夢舊寒淺醉同衾便是鬪燈見月看花  
對酒驚心 攜手滿身花影香霏冉冉露濕羅襟笙歌  
行人歸去回首沈沈人間此夜誤春光一刻千金明日  
問紅巾青鳥蒼苔自拾遺簪

金浮圖

雙調九十四字漢桓帝  
鑄黃金浮圖調名取此

金浮圖

尹 鷲

繁華地王孫富貴玳瑁筵開下朝無事壓紅袖鳳舞黃金翅玉立纖腰一片揭天歌吹滿目綺羅珠翠和風淡蕩偷散沈檀氣堪判醉韶光正媚折盡牡丹豔迷人意金張許史應難比貪戀歡娛不覺金烏墜還惜會難別易金船更勸勒住花驄轡

### 傾杯樂

雙調九十四字唐太宗內宴詔長孫無忌造傾杯曲明皇有馬舞傾杯數十曲宣宗喜吹蘆管自製傾杯樂皆唐樂府也調名始此

傾杯樂

柳永

樓鎖輕煙水橫斜照遙山半隱愁碧片帆岸遠行客路  
香簇一天寒色野梅映雪數枝豔報青春消息年華夢  
促音信斷聲遠飛鴻南北算伊別來無緒翠消紅減  
雙帶長拋擲但淚眼沈迷看朱成碧惹閒愁堆積雨意  
雲心酒情花態辜負高陽客

留客住

雙調九  
十四字

留客住

周邦彥

嗟烏兔正茫茫相催無定只恁東生西沒平均寒暑昨  
見花紅柳綠處處林茂又覩霜前籬畔菊散餘香看看  
又還秋暮 忍思慮念古往賢愚終歸何處爭似高堂  
日夜笙歌齊舉選甚連宵徹晝再三留住待擬沈醉扶  
上馬怎生向主人未肯教去

淒涼犯

又一體雙調

九十四字

淒涼犯

北京道  
中寄懷

張炎

蕭疎野柳嘶寒馬  
蘆花深還見游獵山勢北來甚時曾  
到醉魂飛越酸風自咽擁吟鼻征衣暗裂正淒迷天涯  
羈旅不似灞橋雪誰念而今老嬾賦長楊倦懷休說  
空懷斷梗夢依依歲華輕別待擊歌壺怕如意和冰凍  
折且行行平沙萬里盡是月

前調

張炎

西風暗翦荷衣碎  
有柔絲不解重緝荒煙斷浦晴暉歷

亂半江搖碧悠悠望極忍獨聽秋聲漸急更憐他柳髮  
蕭條相與動愁色 老態今如此猶自留連醉筇遊屐  
不堪瘦影渺天涯儘成行客因甚忘歸漫吹裂山陽夜  
笛夢三十六陂流水去未得

露華

又一體雙調  
九十四字

露華

碧桃

王沂孫

晚寒竚立記鉛輕黛淺初認冰魂碧羅襯玉猶凝茸唾

香痕淨洗妒春顏色勝小紅臨水湔裙煙渡遠應憐舊  
曲換葉移根 山中去年人別怪月悄風輕閒掩重門  
瓊肌瘦損那堪燕子黃昏幾片過溪浮玉似夜歸深雪  
前村芳夢冷雙禽悞宿粉雲

前調

碧桃

張炎

亂紅自雨正翠蹊誤曉玉洞明春蛾眉淡埽背風不語  
盈盈莫恨小溪流水引劉郎不是飛瓊羅扇底從教淨  
冶遠障歌塵 一掬瑩然生意伴壓架醪醑相惱芳吟

玄都觀裏幾回錯認梨花下可憐仙子醉東風猶自  
吹笙殘照晚漁翁正迷武陵

雪明鵲鵲夜

雙調九

十四字

雪明鵲鵲夜

宋徽宗

望五雲多處春深開閬苑別就蓬島正梅雪韻清桂月  
光皎鳳帳龍簾紫嫩風御座深翠金間繞半天中香泛  
千花燈掛百寶聖時觀風重臘有簫鼓沸空錦繡匝



道競呼盧氣貫調歡笑袖裏金錢擲下來侍宴歌太平  
睿藻願年年此際迎春不老

天香

雙調九

十四字

天香

宴錢塘  
張守

毛滂

進止詳華文章爾雅金鑿思異羣彥塵斷銀臺天低鰲  
禁最是玉皇香案燕公視草星斗動昭回雲漢對罷宵  
分又金蓮燭引歸院年來偃藩江畔賴湖山慰公心

眼碧瓦千家借袴襦餘暝黃氣珠庭漸滿望紅日長安  
殊不遠緩轡端門青春未晚

步月

雙調九  
十四字

步月 茉莉

施 岳

玉宇薰風寶堦明月翠叢萬點晴雪煉霜不就散廣寒  
飛屑采珠蓓綠萼露滋嗔銀豔小蓮冰潔花魂在纖指  
嫩痕素英重結 枝頭香未絕還是過中秋丹桂時節

醉鄉冷境怕翻成消歇  
翫芳味春焙旋熏貯穠韻水沈  
頻熱堪憐處輸與夜涼睡蝶

玉連環

又一體雙調  
九十四字

玉連環

懷李  
謫仙

馮艾子

謫仙往矣問當年飲中儔  
侶於今誰在歎沈香醉夢華  
清夜月流浪錦袍宮帶高  
吟三峽動舞劍九州隘玉皇  
歸覲半空遺下詩囊酒佩  
雲月仰挹清芬攬虬鬚尚

友千載晉宋頽波羲皇春夢尊前一慨待相將共躡龍  
肩鯨背海山何處五雲變隼

徵招

雙調九  
十四字

徵招

和煥甫秋聲  
道行路難意

彭元遜

人間無欠秋風處偏到霜痕月杪風雨船篷日夜風波  
未了忽潮生海立又天闊江清欲曉孤迥幽深激揚悲  
壯浮沈浩渺 行路古來難貂裘敝匹馬關山人老錦

字未成寒到君邊書到夢倚門回首兒女燈前娛笑早  
斟酌萬里封侯寶鏡遲霜照

一枝春

雙調九十四字義

取聊折一枝春也

一枝春

酒邊聞歌  
和寄聞韶

周 密

淡碧春姿柳眠醒似怯朝來疎雨芳程乍數喚起探花  
情緒東風尚淺甚先有翠嬌紅嫵應自把羅綺圍春占  
得畫屏春聚 留連繡叢深處動歌雲娟娟低隨香縷

瓊窻夜暖試與細評新譜妝眉媚粉料無奈弄顰佯妒  
還怕是簾外籠鸚笑人醉語

前調

春晚又  
和韻

周 密

簾影移陰杏蕓寒乍濕西園絲雨芳期暗數又是去年  
心緒金花漫翦倩誰畫舊時眉嫵空自傷楊柳風流淚  
滴軟綃紅聚 羅窻那回歌處歎庭花倦舞香消冰縷  
樓空燕冷碎錦嬾尋底譜么絃漫賦曾記是倚嬌成妒  
深院悄門掩梨花倩鶯寄語

前調

為陸浩齋賦梅

張炎

竹外橫枝並闌干試數風繞一信么禽對語彷彿醉眠  
初醒遙知是雪甚都把暮寒消盡清更潤明月飛來瘦  
却舊時疎影東閣漫撩詩興料西湖樹老難認和靖  
晴窓自好勝事每來獨領融融向暖笑塵世萬花猶冷  
須釀成一點春腴暗香在鼎

前調

周蛾

張翥

霧翅煙鬚向雲窓闌巧宮羅輕翦翩翩鬚影側映寶釵

雙燕銀絲蠟蒂弄春色一枝嬌顫誰網得金玉飛錢結  
成翠羞紅怨燈街上元又見鬧春風簇定冠兒爭轉  
偷香傅粉尚憶去年人面妝樓誤約定何處為花留戀  
應化作曉夢尋郎採芳徑遠

前調 守歲

無名氏

竹爆驚春競喧闐夜起千門簫鼓流蘇帳暖翠鼎緩騰  
香霧停杯未舉奈剛要送年新句應自賞歌字清圓未  
誇上林鶯語從他歲窮日暮縱閒愁怎減劉郎風度



屠蘇辦了迤邐柳歡梅妒宮壺未曉早驕馬繡車盈路  
還又把月夕花朝自今細數

江南好

又一體雙調  
九十四字

江南好

吳文英

行錦歸來畫眉添嫵暗塵重拂雕籠穩瓶泉暖花隘鬪  
春容圍密籠香晻靄煩纖手新點團龍溫柔處垂楊鞞  
髻映立花紅 行藏多是客鶯邊話別橘下相逢算江

湖幽夢頻繞殘鐘好結琴兄梅弟莫輕似西燕南鴻偏  
宜醉寒欺酒力簾外凍雲重

雪梅香

雙調九

十四字

雪梅香

柳永

景蕭索危樓獨立面晴空動悲秋情緒當時宋玉應同  
漁市孤煙裊寒碧水村殘葉舞愁紅楚天闊浪浸斜陽  
千里溶溶臨風想佳麗別後愁顏鎮斂眉峰可惜當

年頓乖雨迹雲蹤雅態妍姿正歡洽落花流水忽西東  
無憀恨相思意盡分付征鴻

惜秋華

又一體雙調  
九十四字

惜秋華 八月飛翼  
樓登高

吳文英

思渺西風悵行蹤浪逐南飛高鴈怯上翠微危樓更堪  
凭晚蓬萊對起幽雲澹埜色山容乍捲清淺瞰滄波靜  
銜秋痕一線 十載寄吳苑慣東籬深處把露黃偷翦

移暮景照越鏡意銷香斷秋蛾賦得閒情倚翠尊小眉  
初展深勸待明朝醉巾重岸

芙蓉月

雙調九

十四字

芙蓉月 本意

趙以夫

黃葉舞空碧臨水處照眼紅色齊吐柔情媚態竚立西  
風如訴遙想仙家城闕十萬綠衣童女雲縹緲玉娉婷  
隱隱彩鸞飛舞尊前更風度記天香國色曾占春暮

依然好在還伴清霜涼露一曲闌干敲徧悄無語空相  
顧殘月澹酒闌時滿城鐘鼓

古香慢

雙調九  
十四字

古香慢

滄浪  
看桂

吳文英

怨蛾墜柳離佩搖蕙霜訊南浦謾掩橋扉倚竹袖寒日  
暮還問月中游夢飛過金風翠羽把殘雲剝水萬頃暗  
熏冷麝淒苦 漸浩渺凌山高處秋澹無光殘照誰主

露粟侵肌夜約羽林輕誤翦碎惜秋心更腸斷珠塵蘚  
露怕重陽又催近滿城風雨

紅情

雙調九十四字姜夔作暗香疎影後人名為紅情  
綠意柳永集則號此為紅情與姜詞亦不同也

紅情 荷花

柳 永

無邊香色記涉江自采錦亭雲密翦翦紅衣學舞波心  
舊曾識一見依然自語流水遠幾回空憶看倒影窺妝  
玉潤露痕濕 閒立翠屏側愛向人弄芳背酣斜日料

應太液三十六宮土花碧清興臨風更爽無數滿汀如  
昔泛片葉煙浪裏卧橫紫笛

掃花遊

又一體雙調

七十五字

掃花遊

周邦彥

曉陰翳日正霧霏煙橫遠迷平楚暗黃萬縷聽鳴禽按  
曲小腰欲舞細遶回堤駐馬河橋避雨信流去問一葉  
怨題今到何處春事能幾許任占地持杯掃花尋路

淚珠濺俎歎將愁度日病傷幽素恨入金徽見說文君  
更苦黯凝竚掩重闌徧城鐘鼓

前調

次周美成韻

楊无咎

乳鶯轉午好夢正初醒小軒清楚水沈細縷趁游絲落  
絮緩隨風舞胃起春心又是愁雲怨雨玉人去徧徒倚  
舊時曾並肩處 相望知幾許縱遠隔雲山不遮愁路  
捧杯薦俎記低歌麗曲共論心素薄恨斜陽不道離情  
最苦正凝竚向譙樓又催笳鼓



前調

次周美  
成韻

方千里

野亭話別恨露草芊緜曉風酸楚怨絲恨縷正楊花碎  
玉滿城雪舞耿耿無言暗灑闌干淚雨片帆去縱百種  
避愁愁早知處誰思都幾許但漸慣征塵斗迷歸路  
亂山似俎更重江浪淼易沉書素瞪目銷魂自覺孤吟  
調苦小留竚隔前村數聲簫鼓

前調

次周美  
成韻

楊澤民

素秋漸老正葉落吳江鴈橫南楚暮霞散縷聽寒蟬斷

續亂鴉飛舞客舍淒清那更西風送雨又東去過野店  
小橋都在元處心事天未許似悞出桃源再尋仙路  
去年燕俎記芳腮妒李細腰束素事沒雙全自古瓜甜  
蒂苦欲停竚奈江頭早催行鼓

前調

春游  
遇雨

吳文英

冷空澹碧帶翳柳輕雲護花深霧豔晨易午正笙簫競  
波綺羅爭路驟捲風埃半掩長蛾翠嫵散絲縷漸紅濕  
杏泥愁燕無語乘蓋爭避處就珮解旗亭故人相遇

恨春太妒濺仙裙更惜鳳鈎塵汚  
酹入梅根萬點啼痕  
暗樹峭寒暮更蕭蕭隴頭人去

前調 春雪

吳文英

水雲共色漸斷岸飛花雨聲初峭  
步帷素裊想玉人誤  
惜章臺春老岫斂愁蛾半洗鉛華未曉  
樣輕棹似山陰  
夜晴乘興初到 心事春縹緲記徧地  
梨花弄月斜照  
舊時鬪草恨凌波路狹小庭深窈窕  
蕊瓊簫漸入東風  
郢調暖回早醉西園亂紅休掃

前調 贈芸隱

吳文英

草生夢碧正燕子簾幃影遲春午倦茶薦乳看風籤亂  
葉老沙昏雨古簡蟬篇種得雲根療蠹最清楚帶明月  
自鋤花外幽圃醒眼看醉舞到應市無心與閒同趣  
小山有語恨逋仙占却暗香吟賦暖逼書牀帶草春搖  
翠露未歸去正長安軟紅如霧

前調 送春

吳文英

水園沁碧驟夜雨飄紅竟空林島豔春過了有塵香墜

鈿尚遺芳草步遶新陰漸覺交枝逕小醉深窈愛綠葉  
翠圓勝看花好 芳架雪未埽怪翠被佳人困迷清曉  
柳絲繫棹問閭門自古送春多少倦蝶慵飛故撲簪花  
破帽醉殘照掩重城暮鐘不到

前調

賦瑤圃萬  
象皆春堂

吳文英

暖波映日倒秀影秦山曉鬢梳洗步帷豔綺正梁園未  
雪海棠猶睡藉綠盛紅怕委天香到地畫船繫舞西湖  
暗黃虹卧新霽 天夢春枕被和鳳筑東風宴歌曲水

海宮對起燦驪光乍濕杏梁雲氣夜色瑤臺禁蠟初傳  
翡翠喚春醉問人間幾番桃李

前調

次周美成韻

陳允平

蕙風颺暖漸草色分吳柳陰迷楚寸心似縷看窺簾燕  
妥妒花蝶舞翦翦愁紅萬點輕飄淚雨怕春去問杜宇  
喚春歸去何處後期重細許倩落絮飛煙障春歸路  
長亭別俎對歌塵舞地暗傷蠻素算得相思比著傷春  
又苦正凭竚聽殘陽斷橋簫鼓

前調 秋聲

王沂孫

商飈乍發漸淅淅初聞蕭蕭還住頓驚倦旅背青燈弔  
影起吟愁賦斷續無憑試立荒庭聽取在何許但落葉  
滿階惟有高樹迢迢歸夢阻正老耳難禁病懷淒楚  
故山院宇想邊鴻孤唳砌蟲私語數點相和更著芭蕉  
細雨避無處這閒愁夜深尤苦

前調

王沂孫

捲簾翠濕過幾陣殘寒幾番風雨問春住否但匆匆暗

裏換將花去亂碧迷人總是江南舊樹漫凝竚念昔日  
采香人更何許芳徑攜酒處又蔭得青青嫩苔無數  
故林晚步想參差漸滿野塘山路倦枕閒牀正好微醺  
院宇送淒楚怕涼聲又催秋暮

前調

綠陰

王沂孫

滿庭嫩碧漸密葉迷窓亂枝交路斷紅灑處但匆匆換  
得翠痕無數暗影沈沈靜鎖清和院宇試凝竚怕一點  
舊香猶在幽樹濃陰知幾許且拂簟清眠引筇閒步



杜郎老去算尋芳較晚倦懷難賦縱勝花時到了愁風  
怨雨短亭暮漫青青怎遮春去

前調

賦高疎寮  
東墅園

張炎

煙霞萬壑記曲徑幽尋霽痕初曉綠窓窈窕看隨花甃  
石就泉通沼幾日不來一片蒼雲未掃自長嘯悵喬木  
荒涼都是殘照碧天秋浩渺聽虛籟泠泠飛下孤峭  
山空翠老步仙風怕有采芝人到野色閒門芳草不除  
更好境深悄比斜川又清多少

前調

台城春飲  
醉餘偶賦

張炎

嫩寒禁暖正草色侵衣野光如洗去城數里遶長堤是  
柳釣船深樣小立斜陽試數花風第幾問春意待留取  
斷紅心事難寄芳信成摵指甚遠客他鄉老懷如此  
醉餘夢裏尚分明認得舊時羅綺可惜空簾悞却歸來  
燕子勝遊地想依然斷橋流水

前調

落紅

張翥

洗春雨急碎萬點胭脂蕩空無影館娃骨冷悵香銷塵

土淚殷玉井莫怨東風自古佳人薄命掩鸞鏡縱補得  
茜癡妝壞難整芳事誰管領但蜜膩蜂房蘚斑鴛徑  
一簾晝永綠陰陰尚有絳霞痕凝綠筆招魂已是繁華  
夢醒時芳景換西湖錦雲千頃

前調

邵亨貞

柳花巷陌悄不見銅駝采香芳侶畫樓在否幾東風怨  
笛凭欄日暮一片閒情尚繞斜陽錦樹黯無語記花外  
馬嘶曾送人去風景長暗度奈好夢微茫豔懷清苦


後期已悞翦燭花未卜故人來處水驛相逢待說當年  
恨賦寄愁與鳳城東舊時行旅

前調

張半湖

柳絲曳綠正豆雨初晴水天清夏石榴綻也看猩紅萬  
點倚亭歌榭鎖闥深中料想酒闌歌罷日將下是那處  
藕花香勝沈麝 窗外竹聲打似夏玉敲金送聲瀟灑  
共觀古畫喚石鼎烹茶細商幽話寶鴨香銷天外新蟾  
低掛涼無價又丁東數聲檐馬

御選歷代詩餘卷五十七



總校官庶吉士 臣 張能照

校對官庶吉士 臣 陳 墉

謄錄監生 臣 楊愈柳

欽定四庫全書薈要

集部

御選歷代詩餘卷五十八

九



詳校官編修臣汪鏞

欽定四庫全書薈要

御選歷代詩餘卷五十八目錄

九十五字

水調歌頭上

蘇舜欽

蘇軾 三首

葛勝仲

周紫芝

蔡伸





葉夢得 五首

趙師俠

趙長卿

李綱

曾覿

侯寘

辛棄疾 十三首

張孝祥 四首

韓元吉

朱熹 二首

崔與之

劉克莊 二首

王千秋

王炎

方岳 五首

馮取洽

王以寧

吳文英

覃懷高

蔡松年

王庭筠

趙秉文

段克己

二首

雷淵

元好問 三首

趙孟頫

羅慶

唐桂芳

李孝光

前調 又一體

蘇軾

賀鑄

毛滂二首

葛勝仲

葛郊三首

呂渭老

趙師俠

趙長卿

李綱四首

御選歷代詩餘卷五十八目錄

欽定四庫全書薈要卷二萬七百三十六 集部

御選歷代詩餘卷五十八

九十五字

水調歌頭上

水調隋唐時曲名水調歌者一曲之名如稱河傳曰水調河傳蜀王衍泛舟閬中亦自製水調銀漢曲是也歌頭又曲之始音如六州歌頭氏州第一之類姜夔填此詞名為花犯念奴吳文英名為江南好皆此調也一名凱歌雙調九十五字

水調歌頭

滄浪亭

蘇舜欽

瀟灑太湖岸淡泞洞庭山魚龍隱處煙霧深鎖渺瀰間

方念陶朱張翰忽有扁舟急槳撇浪載鱸還落日暴風  
雨歸路遶汀灣 丈夫志當景盛恥踈閒壯年何事憔悴  
華髮改朱顏擬借寒潭垂釣又恐相猜鷗鳥不肯傍  
青綸刺棹穿蘆荻無語看波瀾

前調

和別  
子由

蘇軾

安石在東海從事鬢驚秋中年親友難別絲竹緩離愁  
一旦功成名遂準擬東還海道扶病入西州雅志因軒  
冕遺恨寄滄洲 歲云暮須早計要褐裘故鄉歸去千

里佳處輒遲留我醉歌時君和醉倒君須扶我惟酒可  
忘憂一任劉玄德相對卧高樓

前調

遺章質夫家  
善琵琶者

蘇軾

昵昵兒女語燈火夜微明  
恩冤爾汝來去彈指淚和聲  
忽變軒昂勇士一鼓填然作氣  
千里不留行回首暮雲  
遠飛絮攬青冥  
衆禽裏真彩鳳獨不鳴  
躋攀寸步千  
險一落百尋輕  
煩子指間風雨置我腸中  
冰炭起坐不  
能平推手從歸去無淚與君傾



前調 子由徐州  
中秋作

蘇軾

離別一何久七度過中秋去年東武今夕明月不勝愁  
豈憶彭城山下同泛清河古汴船上載涼州鼓吹助清  
賞鴻雁起汀洲坐中客翠羽帔紫綺裘素娥無賴西  
去曾不為人留今夜清尊對客明夜孤帆水驛依舊照  
離憂但恐同王粲相對永登樓

前調 泛舟

葛勝仲

夜泛南溪月光影冷涵空棹飛穿碎金電翻動水精宮

橫管何妨三弄重醕仍須一斗知費幾青銅坐久桂花  
落襟袖覺香濃 庾公閣子猷舫興應同從來好景良  
夜我輩最情鍾但恐仙娥以後嫌我塵容俗狀清境不  
相容擊汰同情賞賴有些溪翁

前調

登白鷺亭

周紫芝

歲晚念行役江闊渺風煙六朝文物何在回首更淒然  
倚盡危樓傑觀暗想瓊枝璧月羅韞步承蓮桃葉山前  
鷺無語下寒灘 潮寂寞浸孤壘漲平川莫愁艇子何

處煙樹杳無邊  
王榭堂前雙燕空  
繞烏衣門巷斜日草  
連天只有臺城月  
千古照嬋娟

前調

蔡伸

相逢非草草  
分袂太匆匆  
征裘淚痕浥  
徧眸子怯酸風  
天際孤帆難駐  
柳外香輶望斷  
雲雨各西東  
回首重城  
遠樓觀暮煙中  
黯銷魂  
思陳事已成  
空東郊勝賞歸  
路騎馬踏殘紅  
月下  
一尊芳酒凭檻  
清歌幾曲  
別後少  
人同為問  
桃花面  
一笑為誰容

前調

湖光亭  
落成

葉夢得

修眉掃  
遙碧清鏡  
走回流堤外  
柳煙深淺  
碧瓦起朱樓  
分付平雲千里  
包卷騷人遺思  
春色入簾鉤  
桃李盡無  
語波影動蘭舟  
念謝公平生志  
在滄洲  
登臨漫懷風  
景佳處每難酬  
却歎從來賢士  
如我與公多矣  
名迹竟  
誰留  
惟有尊前醉  
何必問消憂

前調

中秋

葉夢得

河漢下平野  
香霧捲西風  
倚空千嶂橫  
起銀闕正當中

常恨年年此夜醉倒歌呼誰和何事與君同莫恨歲華  
晚容易感梧桐攬清影君試與問天公遙知玉斧初  
斲重到廣寒宮付與孤光千里不遣微雲點綴為我洗  
長空老去狂猶在應未笑衰翁

前調

九月望日與  
客習射西園

葉夢得

霜降碧天靜秋事促西風寒聲隱地初聽中夜入梧桐  
起瞰高城回望寥落關河千里一醉與君同壘鼓鬧清  
曉飛騎引雕弓歲將晚客爭笑問衰翁平生豪氣安

在走馬為誰雄何似當筵虎士揮手弦聲響處雙雁落  
遙空老矣真堪媿回首望雲中

前調

濠州觀  
魚臺作

葉夢得

渺渺楚天闊秋水去無窮兩涯不辨牛馬輕浪舞回風  
獨倚高樓一笑圍圍遊魚來往還戲此波中危檻對千  
里落日照晴空子非我安知我意真同鵬飛鷗化何  
有滄海漫冲融堪笑磻溪遺老白首直鈎溪畔歲晚忽  
衰翁功業竟安在徒自兆非熊

前調

葉夢得

江海渺千里飄蕩歎流年等閒足馬相過乘興却翛然  
十載悲歡如夢撫掌驚呼相語往事盡飛煙此會真難  
偶此醉且留連酒方半誰輕便動離絃我歌未闋公  
去明日復山川空有高城危檻縹緲當筵清唱餘響落  
尊前細雨黃昏後飛雁點遙天

前調

煙雨  
觀

趙師俠

江流清淺外山色有無中平田坡岸迴曲一目望難窮

波面輕鷗容與沙際野航橫渡不信畫圖工路入神仙  
宅翠鎖梵王宮 俯晴郊增勝槩氣橫空雲林城市層  
列知有幾重重更上危亭高處徙倚闌干虛敞象緯逼  
璇穹要盡無邊景煙雨看空濛

前調

元日客  
寧都

趙長卿

離愁晚如織托酒與消磨奈何酒薄愁重越醉越愁多  
忍對碧天好夜皓月流光無際光影轉庭柯有恨空垂  
淚無語但悲歌 因凝想從別後促雙蛾春來底事辜



負紫袖與紅鞵速整雕鞍歸去著意淺斟低唱細看小  
婆婆萬蕊千花裏一任玉顏酡

前調

李綱

物我本虛幻世事若俳諧功名富貴當得須是箇般才  
幸有山林雲水造物端如有意分付與吾儕寄語舊猿  
鶴不用苦相猜 醉中適一杯盡復一杯坐間有客超  
詣言笑可忘懷况是清風明月如會幽人高意千里自  
飛來共笑陶彭澤空對菊花開

前調

和南劍  
薛倅

曾覲

長樂富山水杖屨足追遊故人千里西望雙劍黯迴眸  
多謝扁舟乘興慰我天涯羈思何必羨封侯暮雨疎簾  
捲爽氣颯如秋送征鴻浮大白倚危樓參橫月落耿  
耿河漢近人流堪歎人生離合後日征鞍西去別語却  
從頭老矣江邊路清興漫悠悠

前調

上饒送程  
伯禹尚書

侯寘

涼吹送溪雨落日散汀鷗暮天空闊無際層巘綠蛾浮

上印初辭藩寄拂袖欣還故里歸騎及中秋倚杖飽山  
閣回首翠微樓 一區宅千里客舊從遊甘棠空有餘  
蔭誰解挽公留翰墨文章獨步富貴功名餘事當代仰  
風流暫蠟登山屐終作濟川舟

前調

辛棄疾

我飲不須勸正怕酒尊空別離亦復何恨此別恨匆匆  
頭上貂蟬貴客花外麒麟高塚人世竟誰雄一笑出門  
去千里落花風 孫劉輩能使我 不為公余髮種種如

是此事付渠儂但得平生湖海除了醉吟風月此外百  
無功毫髮皆帝力更乞鑑湖東

前調 盟鷗

辛棄疾

帶湖吾甚愛千文翠奩開先生杖履無事一日走千回  
凡我同盟鷗鷺今日既盟之後來往莫相猜白鶴在何  
處嘗試與偕來 破青萍排翠藻立蒼苔窺魚笑汝癡  
計不解舉吾杯廢沼荒丘疇昔明月清風此夜人世幾  
歡哀東岸綠陰少楊柳便須栽

前調

謝湯朝  
美司諫

辛棄疾

白日射金闕虎豹九關開見君諫疏頻上談笑挽天回  
千古忠肝義膽萬里蠻煙瘴雨往事莫驚猜政恐不免  
耳消息日邊來笑吾廬門掩草徑封苔未應兩手無  
用要把蟹螯杯說劍論詩餘事醉舞狂歌欲倒老子頗  
堪哀白髮寧有種一一醒時栽

前調

和王政之  
吳江觀雪

辛棄疾

造物故豪縱千里玉鸞飛等閒更把萬斛瓊粉蓋玻璃

好卷垂虹千丈只放冰壺一色雲海路應迷老子舊遊  
處回首夢耶非 謫仙人鷗鳥伴兩忘機掀髯把酒一  
笑詩在片帆西寄語煙波舊侶聞道尊鱸正美休裂芟  
荷衣上界足官府汗漫與君期

前調

九日遊  
雲洞

辛棄疾

今日復何日黃菊為誰開淵明漫愛重九曾次正崔嵬  
酒亦關人何事政自不能不爾誰遣白衣來醉把西風  
扇隨處障塵埃 為公飲須一日三百杯此心高處東

望雲氣見蓬萊翳鳳驂鸞公去落佩倒冠吾事抱病且  
登臺歸路踏明月人影共徘徊

前調

題張晉英  
玉峰樓

辛棄疾

木末翠樓出詩眼巧安排天公一夜削出四面玉崔嵬  
疇昔此山安在應為先生見晚萬馬一時來白鳥飛不  
盡却帶夕陽回 勸君飲左手蟹右手杯人間萬事變  
滅今古幾池臺君看莊生達者猶對山林泉壤哀樂未  
忘懷我老尚能賦風月試追陪

前調

辛棄疾

四坐且勿語聽我醉中吟池塘春草未歇高樹變鳴禽  
鴻雁初飛江上蟋蟀還來牀下時序百年心誰要卿料  
理山水有清音歡多少歌長短酒淺深而今已不如  
昔後定不如今閒處直須行樂良夜更教秉燭高會惜  
分陰白髮短如許黃菊倩誰簪

前調

賦傳巖叟  
悠然閣

辛棄疾

歲歲有黃菊千載一東籬悠然政須兩字長笑退之詩



自古此山元有何事當時纔見此意有誰知君起更斟  
酒我醉不須辭回首處雲正出鳥倦飛重來樓上一  
句端的與君期都把軒牕寫徧更使兒童誦得歸去來  
兮辭萬卷有時用植杖且耘耔

前調

三山被台陳  
端仁飲錢

辛棄疾

長恨復長恨裁作短歌行何人為我楚舞聽我楚狂聲  
余既滋蘭九畹又樹蕙之百畹秋菊更餐英門外滄浪  
水可以濯吾纓一杯酒問何似身後名人間萬事毫

髮常重泰山輕悲莫悲生離別樂莫樂新相識兒女古  
今情富貴非吾事歸與白鷗盟

前調

辛棄疾

折盡武昌柳挂席上瀟湘二年魚鳥江上笑我往來忙  
富貴何時休問離別中年堪恨憔悴鬢成霜絲竹陶寫  
耳急羽且飛觴序蘭亭歌赤壁繡衣香使君千騎鼓  
吹風采漢侯王莫把離歌頻唱可惜南樓佳處風月已  
淒涼在家貧亦好此語試平章

前調

送信守  
王桂發

辛棄疾

酒罷且勿起重挽使君鬢一身都是和氣別去意何如  
我輩情鍾休問父老田頭說尹淚落獨憐渠秋水見毛  
髮千尺定無魚望青闕左黃閣右紫樞東風桃李陌  
上下馬拜除書屈指吾生餘幾多病妨人痛飲此事正  
愁余江湖有歸雁能寄草堂無

前調

送鄭厚卿  
赴衡州

辛棄疾

寒食不少住千騎擁春衫衡陽石鼓城下記我舊傳驂

襟以瀟湘桂嶺帶以洞庭青草紫蓋屹西南文字起騷  
雅刀劔化新蠶 看使君於此事定不凡奮髯抵几堂  
上尊俎自高談莫信君門萬里但使民歌五袴歸詔鳳  
凰銜君去我誰飲明月影成三

前調

舟次揚州

辛棄疾

落日暗塵起邊馬獵清秋漢家組練十萬列艦聳層樓  
誰道投鞭飛渡憶昔鳴鏑血汚風雨佛狸愁季子正年  
少匹馬黑貂裘 今老矣搔白首過揚州倦遊欲去江

上手種橘千頭二客東南名勝萬卷詩書事業嘗試與  
君謀莫射南山虎直覓富民侯

前調

隱靜寺  
觀雨

張孝祥

青嶂度雲氣幽壑舞回風江神助我雄觀喚起碧霄龍  
電掣金蛇千丈雷震靈鼉萬疊洶洶欲崩空盡瀉銀潢  
水散入寶蓮宮坐中客凌積翠看弄洪人間應失匕  
筋惟我獨從容淨洗從來塵垢潤及無邊枯槁造物不  
言功天宇忽開霽日在五雲東

前調

汪德邵無  
盡藏樓

張孝祥

淮楚襟帶地雲夢澤南州滄江翠壁佳處突兀起紅樓  
憑仗使君胸次為問仙翁何在長嘯俯清流試遣吹簫  
看騎鶴恐來遊 欲乘風凌萬頃泛扁舟山高月小霜  
降凜凜不能留一弔周郎羽扇尚想曹公橫槊興廢兩  
悠悠此意無盡藏分付水東流

前調

桂林  
中秋

張孝祥

今夕復何夕此地過中秋賞心亭上喚客追憶去年遊

千里江山如畫萬井笙歌不夜狹路看鰲頭玉界湧銀  
闕珠箔捲瓊鈎 馭風去忽吹到嶺南州去年明月依  
舊還照我登樓樓下水明沙淨樓外參橫斗轉搔首思  
悠悠老子興不淺聊復少淹留

前調

過滿  
湘寺

張孝祥

濯足夜灘急晞髮北風涼吳山楚澤行盡只欠到瀟湘  
買得扁舟歸去此事天公付我六月下滄浪蟬蛻塵埃  
外蝶夢水雲鄉 製荷衣紉蘭佩把萍房湘妃起舞一

笑撫瑟奏清商喚起九歌忠憤拂拭三閭文字還與日  
爭光莫遣兒輩覺此樂未渠央

前調

九日次辛  
稼軒韻

韓元吉

今日俄重九莫負菊花開試尋高處攜手躡屐上崔嵬  
放目蒼崖萬仞雲護曉霜成陣知我與君來古寺倚修  
竹飛檻絕塵埃笑談間風滿座酒盈杯仙人跨海休  
問隨處是蓬萊落日平園西望鼓角秋聲悲壯戲馬但  
荒臺細把茱萸看一醉且徘徊



前調

次袁機  
仲韻

朱熹

長記與君別丹鳳九重城歸來故里愁思悵望渺難平  
今夕不知何夕得共寒潭煙艇一笑俯空明有酒徑須  
醉無事莫關情 尋梅去疎竹外一枝橫與君吟風弄  
月端不負平生何處車塵不到有箇江天如許爭肯換  
浮名只恐買山隱却要鍊丹成

前調

朱熹

江水浸雲影鴻雁欲南飛攜壺結客何處空翠渺煙霏

塵世難逢一笑況有紫萸黃菊堪插滿頭歸風景今朝  
是身世昔人非 酬佳節須酌酹莫相違人生如寄何  
事辛苦怨斜暉無盡今來古往多少春花秋月那更有  
危機與問牛山客何必淚沾衣

前調

崔與之

萬里雲間戍立馬劔門關亂山極目無際直北是長安  
莫苦當年塗炭漸靖遠疆鋒鏑天道久應還手寫留屯  
奏炯炯寸心丹 對青燈搔白髮漏聲殘老來勲業未

就妨却一身閒  
梅嶺綠陰青  
子蒲澗清泉白石怪我舊  
盟寒烽火平安夜歸夢到家山

前調

遊蒲澗追和  
崔菊坡韻

劉克莊

敕使竟空返  
公不出梅關  
當年玉座記憶側席問平安  
羽扇尉佗城上野服仙遊閣  
下遼鶴幾時還  
賴有蜀耆舊健筆與書丹  
青油士珠履客各彫殘  
四方感感靡騁獨此尚寬閒  
丞相祠堂何處太傅石碑墮  
淚木老瀑泉寒往者不可作  
置酒且登山

前調

和菊  
坡韻

劉克莊

落日幾呼渡佳夕每留關有時來照清淺鬢雪似潘安  
一曲親蒙君賜兩岸更無人跡惟見鷺飛還隙地欠栽  
接蕉荔雜黃丹柳全疎松尚幼怕摧殘旁人笑我癡  
計管鑰費防閑翁意在乎林壑客亦知夫水月滿腹貯  
清寒賦咏差有媿赤壁與滁山

前調

九日

王千秋

壯日遇重九躍馬恣歡遊如今何事多感霜鬢不禁秋

目斷五陵臺路無復登高千騎鼓吹簇輕裘霜露下南  
國淮漢遶神州 釣松鱸斟郢酒聽吳謳壯心鏢盡今  
夕重見紫茱羞月落笳鳴沙磧烽靜人耕榆塞此志恐  
悠悠擬欲墮清淚生怕菊花愁

前調

夜泛  
湘江

王炎

江月冷如水江水碧於空晚來一霎過雨為我洗秋容  
悄悄四山人靜凜凜三更露下天闊叫孤鴻喚醒蓬牕  
夢身在水晶宮 揖湘妃招月姊御清風素琴韻遠不

覺醉眼杏花紅  
禹穴騎鯨仙去東海釣  
鼇人遠此意與誰同  
倚柁一長嘯幽壑舞魚龍

前調

九日醉中

方岳

左手紫螯蟹右手綠螺杯  
古今多少遺恨俯仰已塵埃  
不共青山一笑不與黃花一醉  
懷抱向誰開舉酒屬吾子  
此興正崔嵬夜何其秋老矣  
盍歸來試問先生歸否  
茅屋欲生苔窮則簞瓢陋巷  
達則鼎彝清廟吾意兩悠哉  
寄語雪溪外鷗鷺莫驚猜

前調

平山堂用  
東坡韻

方岳

秋雨一何碧，山色倚晴空。  
江南江北愁思，分付酒螺紅。  
蘆葉蓬舟千里，菰菜蓴羹一夢，無語寄歸鴻。  
醉眼渺河洛，遺恨夕陽中。  
蘋洲外，山欲暝，斂眉峰。  
人間俯仰陳迹，歎息兩仙翁。  
不見當時楊柳，只是從前煙雨，磨滅幾英雄。  
天地一孤嘯，匹馬又西風。

前調

九日多  
景樓

方岳

醉我一壺玉，了此十分秋。  
江濤還似當日，擊楫渡中流。

問訊重陽煙雨俯仰人間今古此意渺滄洲天地幾今  
夕舉白與君浮 舊黃花新白髮笑重遊滿船明月猶  
在何日大刀頭誰跨揚州鶴去已怨故山猿老借箸欲  
前籌莫倚闌干北天際是神州

前調

壽趙  
文昌

方岳

剡曲一篷月乘興到人間蓬萊山在何處鶴骨不禁寒  
胸有雲門禹穴筆有楔亭晉帖風露洗脾肝秋入紫宸  
殿磨玉寫琅玕 問何如趨瑣闥繫狨鞍江濤今已如



此可奈寸心丹我宋與天無極公等如春難老王氣自  
龍蟠勲業付活石留與世人看

前調

別廬山題  
龍湖閣

方岳

宇宙一杯酒暝色倚重湖青山杳杳何處煙水渺愁予  
別岸風濤噴薄半夜魚龍悲嘯能撼我詩無李白醉不  
醒喚起問何如是耶非天莽蒼雪糝糊蒼顏白髮如  
此空復笑今吾寄語鷺朋鷗侶好在風餐水宿底處不  
煙蕪吾亦從此逝從我者誰歟

前調

社後三日  
邀登北山

馮取洽

雪霽春已半露重午方暄一筇拄上高絕便覺眼前寬  
指點數家樓閣檢校一川花柳綠水接青煙巖岫競圍  
遶風日更清妍鬧媒蜂紛使蝶菜花繁少年正爾行  
樂誰復顧華顛自有此丘此坂那得遊人簫鼓暖響出  
中天歸步不妨晚恰則月初弦

前調

裴公亭  
懷古

王以寧

歲歲橘洲上老葉舞愁紅西山光翠依舊影落酒杯中

人在子亭高處下望長沙城郭獵獵酒帘風遠水湛寒  
碧獨釣綠蓑翁 懷往事追昨夢轉頭空孫郎前日豪  
健頤指五都雄起擁奇才劍客十萬銀戈赤幘歌鼓壯  
軍容何似裴相國談道老圭峰

前調

賦方泉  
望湖樓

吳文英

屋下半流水屋上幾青山賞心千里明鏡入座玉光寒  
雲起南峰未雨雲歛北峰初霽健筆寫青天俯瞰古城  
堞不礙小闌干 繡鞍馬輭紅路乍回班層梯影轉亭

午信手展緇編殘照遊船收盡新月畫簾纔卷人在翠  
壺間天際笛聲起塵世夜漫漫

前調

遊武夷

覃懷高

翠蕤插雲表初意隔仙凡臨風據案一見邂逅似開顏  
幾欲挈舟九曲便擬捫參絕頂直下俯塵寰聊此稅吾  
駕羸得片時閒問仙人緣底事去不還長風浩浩何  
許清夢杳難攀只有蒼煙古木好在清湍白石依舊畫  
圖間回首武夷路杳靄沒雲鬟

前調

蔡松年

雲間貴公子玉骨秀橫秋十年流落冰雪香靄紫貂裘  
燈火春城咫尺曉夢梅花消息蠟紙寫銀鈞老矣黃塵  
眼如對白蘋洲 世間物惟有酒可忘憂蕭閒一段歸  
計佳處著君侯翠竹江村月上但要綸巾鶴氅來往亦  
風流醉墨薔薇露灑徧酒家樓

前調

王庭筠

秋風秃林葉却與鬢生華十年長短亭裏落日冷邊笳

飛雁白雲千里況是登山臨水無賴客思家獨鶴歸何  
晚已復滿林鴉望蓬山雲海闊浩無涯安期玉鳥何  
處袖有棗如瓜一笑那知許事且看尊前故態耳熱眼  
生花肝肺出芒角漱墨作枯槎

前調

趙秉文

四明有狂客呼我謫仙人俗緣千劫不盡回首落紅塵  
我欲騎鯨歸去只恐神仙官府嫌我醉時嗔笑拍羣仙  
手幾度夢中身倚長松聊拂石坐看雲忽如黑霓落

手醉舞紫毫春寄語滄浪流水曾識閒閒居士好為濯  
冠巾却返天台去華髮散麒麟

前調

段克己

清秋好天氣禾黍已登場羣心思荅神貺吉日復辰良  
神既來兮庭宇颯颯西風吹雨仙仗儼長廊巫覡傳神  
語出戶舞佺佺 剗肥豕瀝桂酒奠椒漿一年好處須  
記此樂最難忘風外淵淵簫鼓醉飽滿城黎庶顛倒卧  
康莊夜久羣動息風散一簾香

前調

段克己

雙龍隱扶輦千騎縱翱翔雲旌翠蕤摩蕩遙指白雲鄉  
風馭飄飄高舉雲駕攀留無處煙霧杳茫茫小立西風  
外似聽珮鏘鏘暮天長秋水闊遠山蒼歸路正踏明  
月醉語說豐穰但願明年田野更比今年多稼神貺詎  
能忘君可多醜酒吾復有新章

前調

元好問李獻能游玉華谷少  
姨祠於壁間得漢末田疇詩

雷淵

雲山有宮闕浩蕩玉華秋何年鸞鷲同侶清夢入真遊



卷五十八  
細看詩中元鼎似道區區東井冠帶事崑丘壞壁澆風  
雨醉墨失蛟蚪 問詩仙緣底事媿幽州知音定在何  
許此語為誰留世外青天明月世上紅塵白日我亦厭  
囂湫一笑拂衣去崧頂坐垂鈎

前調

元好問

山家釀初熟取醉不論錢清溪留飲三日魚鳥亦欣然  
見說玉華詩老袖有忘憂萱草牛背穩於船鐵笛久埋  
沒雅曲竟誰傳 坐蒼苔歆亂石耿無眠長松夜半悲

嘯笙鶴下遙天上金堂玉室地下石城瓊壁別有一  
山川把酒問明月今夕是何年

前調

元好問

灘聲蕩高壁秋氣靜雲林回頭洛陽城闕塵土一何深  
前日神光牛背今日春風馬耳因見古人心一笑青山  
底未受二毛侵 問龍門何所似似山陰平生夢想佳  
處留眼更登臨我有一卮芳酒喚取山花山鳥伴我醉  
時吟何必絲與竹山水有清音

前調

元好問

空濛玉華晚瀟灑古淙秋嵩高大有佳處元在玉溪頭  
翠壁丹霞千丈古木寒藤兩岸村落帶林丘今日好風  
色可以放吾舟百年來算惟有此翁遊山川邂逅佳  
客猿鳥亦相留父老雞豚鄉社兒女籃輿竹几來往亦  
風流萬事已華髮吾道付滄洲

前調

和張大  
經盆荷

趙孟頫

江湖渺何許歸興浩無邊忽聞數聲水調念我意悠然

莫笑盆池咫尺移得風煙萬頃來  
傍小牕前稀疎淡紅  
翠持地向人妍  
華峰頭花十丈藕如船  
那知此中佳  
趣別是一壺天  
倒挽翠筍醜酒醉卧碧雲深處雲影自  
田田夢中呼一葉散髮看書眠

前調

羅慶

雨晴山潑翠波淨水拖藍閒來共陪杖履邂逅已成三  
齒齒清泉白石步步碧桃翠竹是處輒幽探行到釣臺  
下怪樹蔭空潭  
踏芳洲尋別館履巉巖壺天日月長

在雲氣滿東南沽得一尊濁酒喚取山花谿鳥聽我醉  
中談異日再過此端為解征驂

前調

唐桂芳

武夸最佳處晴氣碧於藍遠瞻崖壑溪曲六六與三三  
莫問塵生滄海休歎鶴歸華表好景且容探鐵笛破龍  
睡黑雨滿深潭笑神仙留蛻骨閱空巖幾人蹭蹬不  
遇太史滯周南最好擅場老子筆底文章如許何必事  
清談暫憩桃花下白馬稅飛驂

前調

李孝光

東湖浸南麓北蕩帶西山其中大有佳處元不減商顏  
上有雁峰千疊下有龍灘百曲別是一人寰昨夜雨新  
過流水到花間 一張琴一壺酒伴渠閒詩成真宰應  
如萬象入嘲訕北海尊壘依舊東里杖藜無恙未放鬢  
毛斑吾亦秣吾馬不怕路盤盤

前調

又一體  
快哉亭

蘇軾

落日繡簾捲亭下水連空知君為我新作牕戶濕青紅

長記平山堂上欹枕江南煙雨杳杳沒孤鴻認得醉翁  
語山色有無中 一千頃都鏡淨倒碧峰忽然浪起掀  
舞一葉白頭翁堪笑蘭臺公子未解莊生天籟剛道有  
雌雄一點浩然氣千里快哉風

前調

賀鑄

南國本瀟灑六代寢豪華臺城遊冶褻牋能賦屬官娃  
雲觀登臨清夏壁月流連長夜吟醉送年華回首飛鴛  
瓦却羨井中蛙 訪烏衣成白社不容車舊時王謝堂

前雙燕過誰家樓外河橫斗挂淮上潮平霜下檣影落  
寒沙商女蓬牕罇猶唱後庭花

前調

擬饒州法曹掾作

毛滂

金馬空故事方朔謾多端三千牘在玉殿何日賜清閒  
難戀長安鐘漏誰借青雲咳唾拂袖且東還笑殺長纓  
使復轉去秦關吾道在雖不遇面何慚雒陽年少高  
論難與絳侯談富貴暫饒先手晞盡草頭秋露掩鼻出  
東山且飽鯨魚膾風月過江南



前調

衢州雙石堂呈孫守

毛滂

謝安涵雅量，叔夜賦剛腸。清宵假寐，應笑長孺卧淮陽。  
盡徹東平屏障，不廢南樓談詠，宴寢自凝香。庭下一坯土，  
須避赤帷裳。雙石健，含古色，照新堂。百年喬木，陰下僵立，  
兩蛟蒼目送千山。爽氣簾捲，一城風月，杖屨合徜徉。他日峨  
眉秀，相隔望明光。

前調

葛勝仲

下瀨驚船駛，揮塵恐尊空。誰吹尺八寥亮，嚼徵更含宮。

坐愛金波漱灑影落蒲萄漲綠夜漏儘移銅回棹攜紅  
袖一水帶香濃 座中客馳雋辨語無同青鞵黃帽此  
樂誰肯換千鍾岩壑從來無主風月故應長在賞不待  
先容羽化尋煙客家有左仙翁

前調

送唯齋回  
舟松江

葛 郊

年來慣行役楚尾又吳頭餐霞吸露何事佳處輒遲留  
雲聽漁舟夜唱花落牧童橫笛占盡五湖秋據牀興不  
淺人在庾公樓 繡簾捲曲闌暝翠鬟愁森羅萬象與

渠詩裏一時收天設四時風月地會三州山水邀我伴  
浮鷗明朝起歸夢一枕過蘋洲

前調

回舟烏戌  
值雨復晴

葛郊

帆腹飽天際樹髮渺雲頭翠光千頃為誰來去為誰留  
疑是吳宮西子淡掃修眉一抹妝罷玉函秋中流送行  
客卻立望層樓風色變堤草亂浪花愁跳珠翻沫轟  
雷掣電幾時收應是陽侯薄相催我胸中錦繡清唱和  
盟鷗殘霞似相貸一縷媚汀洲

前調

葛 郊

青銅昏水面烏帽裏山頭風濤如此天公作意巧相留  
常記垂虹晚渡卧看菰蒲煙雨屈指十三秋恍若華胥  
夢無語下西樓 翠翻空寒入座不禁愁五絃彈盡隱  
隱天末暮虹收欲伴溪翁釣艇欸乃一聲江上寒碧點  
輕鷗無人阻歸興直欲邁長洲

前調

呂渭老

詩人翻水盡寂寞五侯煙醉魂何在應騎箕尾列青天

記得平生談笑夾岸手栽楊柳同泛夜深船溪水還依  
舊深淺半青竿 小神仙殷七七許閒閒黃梁未熟經  
遊都在夢魂間我厭囂塵濁味幾欲凌雲羽化雞犬不  
留殘俗事丹砂冷且抱一枝安

前調

春野亭  
送別

趙師俠

江亭送行客腸斷木蘭舟水高風快滿目煙樹織成愁  
咿軋數聲柔櫓拍塞一懷離恨指顧隔汀洲獨立蒼茫  
外欲去強遲留 海山長雲水闊思難收小亭深院歌

笑不忍記同遊惟有當時明月千里有情還共後會尚  
悠悠此恨無重數和淚付東流

前調 中秋

趙長卿

今夕知何夕秋色正平分姮娥此際底事越樣好精神  
已是天高氣肅那更清風灑灑萬里沒纖雲把酒臨風  
飲酒面起紅鱗歌一曲舞一曲捧金尊從他妄想老  
兔顛顛正紛紛我為桂花擽醉明日扶頭不起顛倒白  
綸巾天欲知人意夜雨莫傾盆

前調

同德久諸  
季小飲

李綱

律呂自相名韶濩不難諧致君澤物古來何世不須才  
幸可山林高卧袖手何妨閒處醇酒醉朋儕千里故人  
駕不怕物情猜 秋夜永更秉燭且銜杯五年離索誰  
謂談笑豁幽懷況我早衰多病屏跡雲山深處俗客不  
曾來此日埽花徑蓬戶為君開

前調

李綱

如意始身退此事古難諧中年醉飲多病閒去正當才

長愛蘭亭公子弋釣溪山娛適甘旨及朋儕衰病卧江  
海鷗鳥莫驚猜 酒初熟招我友共一杯碧天雲捲高  
掛明月照人懷我醉欲眠君去醉醒君如有意依舊抱  
琴來尚有一壺酒當復為君開

前調

李 綱

花徑不曾掃蓬戶為君開元戎小隊清曉佳客與同來  
我為新來多瘦且恁澆花藝藥隨分葺池臺多謝故人  
意迂訪白雲隈 暮春月修禊事會蘭齋一觴一詠何



媿當日暢幽懷  
況是茂林修竹  
映帶清流激湍  
山色碧  
崔嵬勿復歎陳迹  
且為醉金杯

前調

和李似之  
橫山對月

李綱

秋杪暑方退  
清若玉壺冰  
高樓對月  
天上宮殿不曾扃  
散下淒然風  
露影照江山  
如畫  
渾覺俗緣輕  
弋者欲何慕  
鴻羽正冥冥  
世間法  
惟此事最堪憑  
太虛心量聊假  
梨棗制頽齡  
但使心安身健  
靜看草根泉際  
吟蚓與  
飛螢  
一坐小千劫  
無念契無生

御選歷代詩餘卷五十八

欽定四庫全書薈要

御選歷代詩餘卷五十九目錄

九十五字

水調歌頭

下

李綱

張元幹

四首

曾覲

侯寘

辛棄疾

范成大 二首

陳三聘

張孝祥 二首

仲并

袁去華

李處全

趙彥端

陸游

劉過

楊炎 二首

劉光祖

李泳

毛玘

韓澆 五首

汪莘 二首

吳潛

李昉英 二首

盧炳 二首

石孝友

林正大 四首

葛長庚

吳子孝

楊慎

前調 又一體

蘇軾

黃庭堅

呂渭老

向子諲

蔡伸

羅願

八聲甘州

湯恢

前調 又一體

蕭列

鳳凰臺上憶吹簫

李清照

趙文

張翥

馬洪

天香 又一體



王觀

玉女迎春慢

彭元遜

傾杯樂 又一體

柳永

夢揚州

秦觀

尾犯 又一體

柳永

白雪 又一體

楊无咎

雙瑞蓮

趙以夫

慶清朝慢

文徵明

塞姑 又一體

柳永

小聖樂

元好問

芭蕉雨

晏璧

玉梅香慢

無名氏

徵招 又一體

趙以夫

周密

張炎  
二首

聲聲慢

周密

鬪龍四犯

劉基

御選歷代詩餘卷五十九目錄

欽定四庫全書薈要卷二萬七百三十七

集部

御選歷代詩餘卷五十九

九十五字

水調歌頭

下

水調歌頭

李太白  
畫像

李綱

太白乃吾祖逸氣薄青雲開元有道聊復乘興一來賓  
天子呼來方醉灑面清泉微醒餘吐濕龍巾詞翰不加  
點歌闋滿宮春  
筆風雨心錦繡極清新大兒中令神  
契兼有坐忘人不識將軍高貴醉裏指汗吾足乃敢尚

呵嗔千載已仙去  
圖像聳風神

前調

虎丘  
中秋

張元幹

萬里冰輪滿千丈  
玉盤浮廣寒  
宮殿西望湖海冷  
光流  
掃盡長空纖翳散  
亂疎林清影  
風露迫人愁  
徐步行歌  
去危坐不眠休  
問孤蓬緣底事  
苦淹留  
倦遊回首向  
來雲卧兩星周  
此夜此生長好  
明月明年何處  
歸興在  
南州老境一  
僮父異縣四  
中秋

前調

張元幹

今夕定何夕秋水滿東甌悲涼懷抱何事還倍去年愁  
萬里碧空如洗寒浸十分明月簾捲玉波流非是經年  
別一歲兩中秋坐中庭風露下冷颼颼素娥無語相  
對尊酒且遲留琴罷不堪幽怨遙想三山影外人倚夜  
深樓矯首望霄漢雲海路悠悠

前調

丁丑春登  
垂虹亭

張元幹

拄策松江上舉酒酌三高此生飄蕩往來身世兩徒勞  
長羨五湖煙艇好是秋風鱸膾笠澤久蓬蒿想像英靈

在千古傲雲濤 俯滄波吞空曠恍神交解衣盤薄政  
須一笑屬吾曹洗盡人間塵土埽去胸中冰炭痛飲讀  
離騷縱有垂天翼何用釣連鰲

前調

張元幹

放浪形骸外憔悴山澤癯倒冠落佩此心不待白髭鬢  
聊復脫身鷓鷯未暇先尋水竹矯首漢庭疏長夏嗽丹  
荔兩紀傲閒居 忽風飄連雨打向西湖藕花深處尚  
能同載麴生無聽子談天舌本澆我書空習次醉卧踏



冰壺畢竟凌煙像何似輞川圖

前調

曾覲

溪山多勝事詩酒辨清游主人為我增葺臺榭足凝眸  
髣髴玉壺天地隱見瀛洲風月千首傲王侯誰與共登  
眺公子氣橫秋記當年曾共醉庾公樓一杯此際重  
話前事逐風流多謝兼金清唱更擬重陽佳節按菊任  
扶頭但願身長健浮世揅悠悠

前調

題岳麓  
法華臺

侯寘

曉霧散晴渚秋色滿湘山青鞵黃帽忻與名士共躋攀  
窈窕深林幽谷詰曲危亭飛觀俛首視塵寰長嘯望天  
末餘響下雲端白鶴去荒井在汲清寒醒然毛骨浮  
丘招我御風還拂拭蒼崖苔蘚一寫胸中豪氣渺渺洞  
庭寬山鬼善呵護千載照層巒

前調

辛棄疾

萬事到白髮日月幾西東羊腸九折歧路老我慣經從  
竹樹前溪風月雞酒東家父老一笑偶相逢此樂竟誰

覺天外有冥鴻 味平生公與我定無同玉堂金馬自  
有佳處著詩翁好鎖雲煙牕戶怕入丹青圖畫飛去了  
無蹤此語更癡絕真有虎頭風

前調

范成大

細數十年事十處過中秋今年新夢忽到黃鶴舊山頭  
老子箇中不淺此會天教重見今古一南樓星漢澹無  
色玉鏡獨空浮 斂秦煙收楚霧熨江流關河離合南  
北依舊照清愁想見姮娥冷眼應笑歸來霜鬢空散黑

貂裘醜酒問蟾兔肯去伴滄洲

前調

燕山九日作

范成大

萬里漢家使雙節照清秋舊京行徧中夜呼嘯濟黃流  
寥落桑榆西北無限太行紫翠相伴過盧溝歲晚客多  
病風露冷貂裘對重九須爛醉莫牽愁黃花為我一  
笑不管鬢霜羞袖裏天書咫尺眼底關河百二歌罷此  
生浮惟有平安信隨雁到南州

前調

陳三聘

玉鑑十分滿清露一年秋漂流蹤跡誰念楚尾與吳頭  
此夜刮明塵眼望極好張詩膽何處有高樓浩蕩銀潢  
冷縹渺白雲浮笑勞生難坎止亦乘流闌干拍碎清  
夜起舞不勝愁萬里關河依舊一寸功名烏有清淚滴  
衣裘老去心空在歸夢繞蘋洲

前調

舟過金山寺

張孝祥

江山自雄麗風露與高寒寄聲月姊借我寶鑑此中看  
幽壑魚龍悲嘯倒影星辰搖動海氣夜漫漫擁起白銀

闕危駐紫金山 表獨立飛玉佩整雲冠  
漱冰濯雪眇視萬里一毫端  
回首三山何處聞道羣仙笑我邀我欲  
俱還揮手從此去翳鳳更驂鸞

前調

張孝祥

艤棹太湖岸天與水相連  
垂虹亭上五年不到故依然  
洗我征塵三斗快挹商飈千里鷗鷺亦翩翩  
身在水晶闕真作馭風仙  
望中秋無五日月還圓  
倚闌清唱孤發驚起壑龍眠  
欲酌鴟夷西子未辦當年功業空繫五

湖船不用知餘事  
鱸膾正甘鮮

前調

浮遠堂

仲并

靜練平千頃  
華棟俯中流  
凌晨畫戟來看宿  
雨斷虹收  
八九曾中雲夢三千筆  
端風月無處快凝眸  
笑詠一堂上  
揮塵氣橫秋  
俯危闌紅日下  
暮雲收無窮  
偉觀祇應天意為君謀  
容我時醒時醉獨泛微煙微雨浩蕩逐  
輕鷗不羨岳陽勝  
丹碧聳層樓

前調

袁去華

天下最奇處綠水照朱樓三高仙去白頭千古想風流  
跨海晴虹垂飲極目滄波無際落日去漁舟蘋末西風  
起橘柚洞庭秋 記當年攜長劍覓封侯而今憔悴長  
安客裏歎淹留回首洪崖西畔隨分生涯可老卒歲不  
知愁做箇終焉計誰羨五湖遊

前調

送景文

李處全

上馬趣攜酒送客古朱方秋風斜日山際低草見牛羊  
酩酊不知更漏但見橫江白露清映月如霜平睨廣寒



殿誰說路岐長  
醉還醒時起舞念吾鄉  
江山爾爾回首千載幾興亡  
一笑書生事業誰道管城居士不換碧  
油幢好在中泠水擊節奏伊涼

前調

秀州坐上作

趙彥端

秋色忽如許風露皎如空  
平生青鬢餘地老與故人同  
憶得鱸魚來後雜以洞庭新橘月墮酒杯中  
賓客可人意歌舞轉春風  
坐間玉花底月又從容  
從容更好無奈多病已衰翁  
賴有主人風味識我少年狂態乞與酒

顏紅一醉曉鴉起流水任西東

前調

多景樓

陸游

江左占形勝最數古徐州連山如畫佳處縹渺著危樓  
鼓角臨風悲壯烽火連空明滅往事憶孫劉千里曜戈  
甲萬竈宿貔貅露沾草風落木歲方秋使君宏放談  
笑洗盡古今愁不見襄陽登覽磨滅遊人無數遺恨黯  
難收叔子獨千載名與漢江流

前調

劉過

春事能幾許密葉著青梅日高花困海棠風急想都開  
不惜春衣典盡只怕春光歸去片片點蒼苔能得幾時  
好追賞莫徘徊 雨飄紅風換翠苦相催人生行樂且  
須痛飲莫辭杯坐則高談風月醉則恣眠芳草醒後亦  
佳哉湖上新亭好何事不曾來

前調

呈趙  
總領

楊炎

買得一航月醉卧出長安平堤千里過盡楊柳綠陰間  
依約曉鶯啼處認得南徐風物客夢恍驚殘重到舊遊

所如把畫圖看 英雄事千古意一凭闌惜今老矣無  
復健筆寫江山天上人間知己賴有使星郎宿照映此  
塵寰準擬五湖去為乞釣魚竿

前調

楊炎

把酒對斜日無語問西風胭脂何事都做顏色染芙蓉  
放眼暮江千頃中有離愁萬斛無處落征鴻天在闌干  
角人倚醉醒中 千萬里江南北浙西東吾生如寄尚  
想三徑菊花叢誰是中州豪傑借我五湖舟楫去作釣

魚翁故國且回首此意莫匆匆

前調

劉光祖

客夢一回醒三度碧梧秋仰看今夕天上河漢又西流  
早晚涼風過雁驚落空江一葉急雨鬧清溝歸計休令  
暮宵露浥征裘古來今生老病許多愁那堪更說無  
限功業鏡中羞只有青山高致對此還論世事舉白與  
君浮送我一杯酒誰起舞涼州

前調

題甘將軍  
廟卷雪樓

李泳

危樓雲雨上其下水浮天羣山四合飛動寒翠落檐前  
盡是清秋闌檻一笑波翻濤怒雪陣卷蒼煙炎暑去無  
跡清駛久翩翩夜將闌人欲靜月初圓素娥弄影光  
射空際渺嬋娟不用濯纓垂釣喚取龍宮仙駕耕此萬  
瓊田橫笛望中起吾意已超然

前調

次陸務觀登  
多景樓韻

毛 玘

襟帶大江左平望見三州鑿空遺跡千古奇勝米公樓  
太守中朝者舊別駕當今豪逸人物貌應劉此地一尊

酒歌笑擁貔貅 楚山曉淮月夜海天秋登臨無盡須  
信詩眼不供愁恨我相望千里空想一時高唱零落幾  
人收妙賞頻回首誰復繼風流

前調

對木樨小  
飲次韻

韓 流

明月到花影把酒對青紅此情飄灑但覺清景滿簾櫳  
人被好花相惱花亦知人幽韻佳處本同風揮手謝塵  
網舉袂步蟾宮 秋已半幽澗側亂山中故人過我終  
夕乘興可千鍾賴有曲江才子坐上平章花月不管老

英雄心事將何寄醉語別匆匆

前調

清明  
嚴瀨

韓流

今古釣臺下行客繫扁舟扁舟何似雲山千疊亦東游  
我欲停橈一醉與寫生平幽憤橫管更清謳小上客星  
閣短鬢獨搔頭風乍斂雲未起雨初收一年花事數  
聲鷓鴣欲春休弔古懷賢情味只有浮名如故誰復識  
羊裘賴得玄英隱相望此溪流

前調

韓流



一枕暑風外事事且隨緣隨緣何處琴劍閒泊此層顛  
日遶九天樓殿煙罨四山林薄塵土市聲前老眼醉還  
醒猶得到詩邊 橋南院雙桂影有名言江湖人物好  
在收拾付書簾回首吾廬無恙寄卧僧牕何事鴻鵠本  
高騫月調賦明月誰道更超然

前調

韓 澆

新月已如許我問帶湖梅人間題句贏得浮澂酒盈杯  
拓落豪英滿座爛漫風騷連紙天外鳳凰來只恐輕孤

負莫待巧安排 空翠滴寒爽矣晚佳哉為君絕倒拆  
盡千樹玉蓓開渺渺章泉好在寂寂盧家仙去今古付  
尊壘拍手見花木放眼記莓苔

前調

次宋  
倅韻

韓 流

嘉節已吹帽誰復見南山南山佳處臺上雲繞一溪環  
猶記使君同醉化鶴千年何在今古自應慳勝事漫陳  
迹風物只高寒 都莫問歸酒畔集毫端等閒吟笑而  
今賴有孔融尊偉矣廣平心致贏得相遭淡泊感舊唱

酬間且看小齋菊抵掌共憑闌

前調

汪莘

寄語山阿子何日出幽篁蘭衣蕙帶為我獨立萬尋岡  
頭上青天蕩蕩足下白雲靄靄和氣自悠揚一陣東風  
至靈雨過橫塘 招山鬼弔河伯俟東皇朱宮紫闕何  
事宛在水中央長望龍輶雷駕憑仗簫鐘交鼓賓日出  
扶桑我乃援北斗子亦射天狼

前調

菊酒得三十六  
壺酌黃山神

汪莘

釀秫小春月取酒雪花晨滿壺插破浮蟻湧起碧鱗鱗  
誰覺東風密至更帶梅香潛入甕裏淨無塵一見酒之  
面便得酒之心 這番酒未及飲未留賓黃山圖就舊  
日境界喜重新三十六峰雲嶂三十六溪煙水三十六  
壺春寄語黃山道我是境中人

前調

送吳叔永

吳潛

才惜季方去又更別元方驚心天下雙鳳接翅下高岡  
萬里瞿塘煙浪一片昭亭雲月渺渺正相望夜雨連風

壑此意獨淒涼  
杜鵑聲猶不住攬離腸  
黃雞白酒吾亦歸  
興動家鄉人事紛紛難料  
世事悠悠難說搔首對  
穹蒼肯落兒曹淚一笑付滄浪

前調

題舫齋

李昴英

郭外足幽勝潮入漲溪流舫齋小小一葉老子日遨遊  
管領白蘋紅蓼披戴綠蓑青弱直釣任沈浮玉縷飽魚  
鱠雪陣狎河鷗  
箇中眠箇中坐箇中謳箇中收拾詩  
料觴客箇中留休羨乘槎博望且聽洞簫赤壁樂處是

瀛洲日月蕩雙槩天地一虛舟

前調

庭登春臺

李昉英

野趣在城市崛起此臺高誰移蓬島馮夷夜半策靈鼇  
十萬人家甃碧四面峰巒擁翠遠峙拍銀濤插漢筆雙  
塢簸兩葉輕舫我乘風時一到共嬉遨江山無復偃  
蹇彈壓有詩豪寶劔孤橫星動鐵笛一聲雲裂寒月水  
宮袍滄海一杯酒世界渺鴻毛

前調

題清圻景星亭上慕容宰

盧炳

華亭新偉觀勝地得高雄  
凭闌徙倚杳渺萬里景無窮  
好是江流縈繞那更雲天舒闊  
壘嶂倚晴空眼界無盡  
藏懷抱有清風 主人賢開綺席  
泛金鍾放懷一笑許  
我滿酌醉顏紅祇恐蠶書即下  
促起飛鳧東去行作黑  
頭公還記今朝客曾對一杯同

前調

盧炳

風馭過姑射雲珮挹浮丘  
丁寧月姊為我澂霽一天秋  
盡展冰匳玉鑑要看瑤臺銀闕  
萬里冷光浮分與世間

景好在水邊樓  
想霓裳呈妙舞起清謳  
藍橋何處試  
尋玉杵恣追游  
擬待鉛霜擣就  
緩引瓊漿沈醉  
誰信是  
良籌長嘯跨鯨背  
不必願封留

前調

石孝友

美人在何許  
相望正悠悠  
雲牕霧閣  
遙想宛在海中洲  
空對殘雲冷雨  
何限重山疊水  
一夢到無由  
遺怨寫紅葉  
薄倖記青樓  
金烏擲玉蟾  
缺物華休  
鳳梧鴛竹一  
夜風露各驚秋  
惟有遠山無賴  
淡掃一眉晴綠  
特地向



人愁斂袂且歸去回首漫遲留

前調

括聽真上人琴歌

林正大

耿耿銀潢淨  
牕月瑩如冰  
朱絲一扣萬籟不起  
冷光凝  
千古遺音猶在一洗  
淫哇鄭衛北里與南陵  
孰識聲音  
事哀樂不同情  
咽流泉夏鳴玉擊浮金  
老龍啼曉幼  
猿忽復暮山吟  
為我臨風再奏仙  
鵠翩翩十二感物一  
何靈此曲誰當聽  
四海有知音

前調

括岳陽樓記

林正大

欲狀巴陵勝千古岳之陽洞庭在目遠銜山色俯長江  
浩浩渾無涯際爽氣北通巫峽南去極瀟湘騷人與遷  
客覽物興尤長錦鱗游汀蘭郁水鷗翔波瀾萬頃碧  
色上下一天光皓月浮金千里把酒登樓對景喜極自  
洋洋憂樂有誰會寵辱兩俱忘

前調

括黃州  
竹樓記

林正大

聽說竹樓好佳地占黃岡月波相接俯臨江瀨挹山光  
急雨檐喧瀑布密雪瓴敲碎玉幽闥興尤長琴調更虛

暢詩韻轉清揚  
公退暇披鶴氅戴華陽  
手披周易消  
磨世慮坐焚香  
縹緲煙雲竹樹迎  
送夕陽素月勝  
槩總  
難量欲辦騷人事  
淪茗漱清觴

前調

括廬  
山高

林正大

廬山幾千仞  
屹立竝長江  
揚瀾左蠡洪  
濤巨浪日春撞  
風止雲消水淨  
相與泊舟登岸  
攀磴望空磴  
岩壑響松  
桂巨石激流淙  
事幽尋遺世俗  
絕紛塵幽花野  
草香  
滿時有鶴飛雙  
羨子買田築室  
欲使浮嵐暖翠  
坐卧對

軒牕我欲為君說安得筆如扛

前調

葛長庚

江上春山遠山下暮雲長相留相送時見雙燕語風檣  
滿目飛花萬點回首故人千里把酒沃愁腸回雁峰前  
路煙樹正蒼蒼漏聲殘燈焰短馬蹄香浮雲飛絮一  
身將影向瀟湘多少風前月下迤邐天涯海角魂夢亦  
淒涼又是春將暮無語對斜陽

前調

詠百舌

吳子孝

落日青蕪岸移棹綠蘋洲清和天氣碧樹陰合暮雲稠  
忽聽林間百舌巧作千般妙語嘔啞更咿嚶側耳行吟  
畔如聽好歌喉車音細機韻杳櫓鳴柔誰家兒女昵  
昵學語不能休乍止猶啼宛轉吹徵呵宮迭奏百鳥枉  
啁啾翹首上林苑好共鳳凰遊

前調

賞牡丹

楊慎

春宵微雨後香徑牡丹時雕闌十二金刀誰翦兩三枝  
六曲翠屏深掩一架銀箏緩送且醉碧霞巵輕寒香霧

重酒暈上來遲  
席上歡天涯恨雨中姿  
向人如訴欲  
將彩筆記相思  
九十春光堪惜  
萬種心情難寫  
粉淚半  
低垂曉看紅濕處  
千里夢佳期

前調

又一體  
中秋懷子由

中

蘇軾

明月幾時有  
把酒問青天  
不知天上宮闕今夕是何年  
我欲乘風歸去  
又恐瓊樓玉宇  
高處不勝寒  
起舞弄清影  
何似在人間  
轉朱閣  
低綺戶  
照無眠  
不應有恨何事長向別時圓  
人有悲歡離合  
月有陰晴圓缺  
此事古

難全但願人長久千里共嬋娟

前調

黃庭堅

瑤草一何碧春入武陵溪溪上落花無數枝上有黃鸝  
我欲穿花尋路直入白雲深處浩氣展虹霓祇恐花深  
裏紅露濕人衣坐白石敲玉枕拂金徽謫仙何處無  
人伴我白螺杯我為靈芝仙草不為絳脣丹臉長嘯亦  
何為醉舞下山去明月逐人歸

前調

題季修  
書室

呂渭老

秋齋多夢渴舌本欲生煙獨步一庭明月雁字已橫天  
作箇生涯不遂松竹雨荒三徑却憶五湖船小阮貧尤  
甚犢鼻挂長竿 白鷗汀風共水一生閒橫琴喚鶴要  
攜妻子老雲間燈火熒熒深夜高卧南窓折几杯到不  
留殘莫遣江湖手遮日向長安

前調

趙伯山席  
上見梅

向子諲

天公深藏巧雲裏放春回不到閒花凡草都付與疎梅  
獨立水邊林下瀟灑冰容孤豔清瘦玉腰肢觸撥暗香



動風味欲愁誰  
姮娥攜青女過夜闌時  
瑤冠瓊佩粲  
然一笑亦何奇  
賸欲舉觴對影  
不怕月明霜重  
寒氣著  
人衣  
只恐鄰笛起  
化作玉塵飛

前調

別彭城

蔡伸

醉擊玉壺缺  
恨寫綠琴哀  
悠悠往事誰問  
離思渺難裁  
綠野堂前桃李  
燕子樓中歌吹  
那忍首重回  
惟有舊時  
月遠  
逐人來  
小庭空清夜  
永獨徘徊  
伴人幽怨  
一枝瀟灑  
隴頭梅  
心斷雲帆西去  
目送煙波東注  
千里接

長淮為我將雙淚好過楚王臺

前調

中秋和  
施司諫

羅願

秋宇淨如水月鏡不安臺鬱孤高處張樂語笑脫塵埃  
檐外白毫千丈座上銀河萬斛心境兩佳哉俯仰共清  
絕底處著風雷問天公邀月姊媿凡才婆娑人世羞  
見蓬鬢漾金壘來歲公歸何處照耀彩衣簪橐禁直且  
休催一曲庾江上千古繼韶陔

八聲甘州

一名甘州曲西域記載龜茲國工製伊州甘州涼州等曲皆翻入中國詞調八聲者歌時之節奏也

雙調九

十五字

### 八聲甘州

湯恢

摘青梅薦酒甚殘寒猶怯苧羅衣正柳腴花瘦綠雲冉冉紅雪霏霏隔屋秦箏依約誰品春詞回首繁華夢流水斜暉寄隱孤山山下但一瓢飲水深掩苔扉羨青山有思白鶴忘機悵年華不禁搔首又天涯彈淚送春歸銷魂遠千山啼鴉十里茶蘼

前調

又一體

蕭列

可憐生飄零到荼蘼依然舊銷魂殘春幾許風風雨雨  
客裏又黃昏無奈一江煙霧腥浪捲河豚身世忽如葉  
那自清渾莫厭悲歌笑語奈天涯有夢白髮無根怕  
相思別後無字寫回文更月明洲渚杜鵑聲裏立向臨  
分三生石情緣千里風月柴門

鳳凰臺上憶吹簫

取列仙傳秦弄玉  
事雙調九十五字

鳳凰臺上憶吹簫

宋媛  
李清照

香冷金猊被翻紅浪起來慵自梳頭任寶奩塵滿日上  
簾鈎生怕離懷別苦多少事欲說還休新來瘦非干酒  
病不是悲秋 休休這回去也千萬徧陽關也則難留  
念武陵人遠煙鎖秦樓惟有樓前流水應念我終日凝  
眸凝眸處從今又添一段新愁

前調

轉官  
迷

趙文

白玉搓成香羅捻就為誰特地團團羨司花神女有此

清閒疑是弓鞞蹴踘剛剛踢誤掛花間方信道醅醖失色玉蕊無顏  
凭欄幾回澹月怪天上冰輪移下塵寰  
奈堪同玉手難插雲鬟人道轉官毬也春去也欲轉何  
官聊寄與詩人案頭冰雪相看

前調

沈野雲  
吹簫

張翥

琪樹鏘鳴春冰碎落玉盤珠瀉還停漸一絲風嫋悠颺  
清冥疑把紅牙趁節想有人記豆銀屏何須教琵琶漢  
女錦瑟湘靈  
追思舊時勝賞醉幾度西湖山館池亭

慣倚歌花月按舞娉婷歲晚相逢客裏且一尊同慰漂  
零君休惜吳音朔調盡與吹聽

前調 秋夜

馬洪

澹澹秋容澄澄夜影娟娟月挂梧桐愛簫聲縹緲簾影  
玲瓏彩鳳銜書未至玉宇淨香霧空濛涼如水翠苔凝  
露琪樹吟風 匆匆年華暗換嗟舊歡成夢彷彿飛蓬  
想清江泛鷁紫陌遊驄應念佳期虛負瞻素彩感慨相  
同凝情久誰家搗練砧杵丁東

天香

又一體雙調  
九十五字

天香

王觀

霜瓦鴛鴦風簾翡翠今年較是寒早矮釘明牕側開朱  
戶斷莫亂教人到重陰未解雲共雪商量未了青帳垂  
氈要密紅鑪圍炭宜小呵梅弄妝試巧繡羅衣瑞雲  
芝草伴我語時同語笑時同笑已被金尊勸酒又唱新  
詞故相惱盡道窮冬元來恁好



玉女迎春慢

雙調九  
十五字

玉女迎春慢

彭元遜

纔入新年逢人日  
拂拂澹煙無雨  
葉底妖禽自語  
小啄幽香還吐  
東風辛苦便怕有踏青人  
誤清明寒食消得  
渡江黃翠千縷  
看臨小帖宜春  
填輕暈濕碧花生霧  
為說釵頭裊裊繫著輕盈  
不住問郎留否似昨夜教成  
鸚鵡走馬章臺憶得畫著歸去

傾杯樂

又一體雙調  
九十五字

傾杯樂

柳永

離讌愍懃蘭舟凝滯看看送行南浦情知道世人難使  
皓月長圓彩雲鎮聚算人生悲莫悲于輕別最苦正歡  
娛便分鴛侶淚滴瓊臉梨花一枝春帶雨慘黛別臨  
行猶自再三問道君須去頻耳畔低語知多少他日深  
盟平生丹素從此盡把憑鱗羽

夢揚州

雙調九  
十五字

夢揚州

秦觀

晚雲收正柳塘煙雨初休燕子未歸側側輕寒如秋小  
欄外東風軟透繡幃花密香稠江南遠人何處鷓鴣啼  
破春愁長記曾陪燕遊酬妙舞清歌麗錦纏頭殢酒  
困花十載因誰淹留醉鞭拂面歸來晚望翠樓簾捲金  
鈎佳會阻離情正亂頻夢揚州

尾犯

又一體雙調  
九十五字

尾犯

柳永

夜雨滴空階孤館夢回情緒蕭索一片閒愁想丹青難  
貌秋漸老蛩聲正苦夜將闌燈花漸落最無端處忍把  
良宵只恁孤眠却佳人應怪我自別後寡信輕諾記  
得當時翦香雲為約甚時向幽閨深處按新詞流霞共  
酌再同歡笑肯把金玉珍珠博

白雪

又一體雙調  
九十五字

白雪

楊无咎

檐收雨脚雲乍斂依舊又滿長空紋蠟焰低熏鑪燼冷  
寒衾擁盡重重隔簾櫳聽撩亂撲漉春蟲曉來見玉樓  
珠殿恍若在蟾宮長愛越水泛舟藍關立馬畫圖中  
悵望幾多詩意無句可形容誰與問已經三白忒是報  
年豐未應真箇情多老却天公

# 雙瑞蓮

雙調九十五字  
與雙頭蓮無涉

## 雙瑞蓮

竝頭蓮

趙以夫

千機雲錦裏看竝蒂新房駢頭芳蕊清標豔態兩兩翠  
裳霞袂似是商量心事倚綠蓋無言相對天蘸水彩舟  
過處鴛鴦驚起 縹緲漾影搖香想劉阮風流雙仙姝  
麗閒情未斷猶戀人間歡會莫待西風吹老薦玉醴碧  
筒擿醉清露底月照一襟歸思

慶清朝慢

雙調九  
十五字

慶清朝慢

文徵明

天朗氣清惠風和暢勝遊何似山陰春光自來堪戀一  
刻千金蘭舟初泛畫橋春水一篙深煙霏處離離淺草  
冉冉遙岑 且此傍花隨柳柳陰繫馬花外嚙幽禽擾  
擾蜂黏柳絮蝶繞花心為問朱衣車馬何如我白髮園  
林新月上竹枝風動環珮清音

塞姑

又一體雙調  
九十五字

塞姑

柳永

一聲雞又報殘更歇秣馬中車催發草草主人燈下別  
山路險新霜滑瑤珂響起栖烏金鐙冷敲殘月漸西風  
緊襟袖淒裂 遙指白玉京望斷黃金闕遠道何時行  
徹算得佳人凝恨切應念念歸時節相見了執柔荑嘉  
會處沾香雪免鴛衾兩恁虛設



小聖樂

雙調九十五字元好問製蓮花  
曲以授歌者亦名驟雨打新荷

小聖樂

元好問

綠葉陰濃徧池亭水閣徧趁涼多海榴初綻朶朶感紅  
羅乳燕雛鶯弄語對高柳鳴蟬相和驟雨過似瓊珠亂  
撒打徧新荷 人生百年有幾念良辰美景休放虛過  
富貧前定何用苦張羅命友邀賓宴賞飲芳醕淺斟低  
歌且醕酌從教二輪來往如梭

芭蕉雨

雙調九

十五字

芭蕉雨

梅

晏 璧

角聲高吹夢斷月痕尚挂林梢萬葉千花似掃綠避紅  
逃讓與寒梅獨殿還狀元宰相當消憇了却殘年教人  
媿煞離騷 富貴等鴻毛紛紛傷春濃李天桃自是冰  
魂欲解漫倩并刀只道乾坤清氣怎知他雪虐風饕睡  
起望北斗闌干人間翠羽嘈嘈

玉梅香慢

雙調九  
十五字

玉梅香慢 本意

無名氏

寒色猶高春力尚怯微律先催梅拆曉日輕烘清風頻  
觸疑散數林殘雪嫩英妒粉嗟素豔有蜂蝶全似人人  
向我依然頓成離缺徘徊寸腸萬結又因知暗成凝  
咽撚蕊憐香不禁恨深難絕若是芳心解語應共把此  
情細細說淚滿闌干無言強折

徵招

又一體雙調  
九十五字

徵招雪

趙以夫

玉壺凍裂琅玕折，駸駸逼人衣袂暖。絮漲空飛，失前山  
橫翠欲低還。又起似妝點，滿園春意，記憶當時，剡中情  
味。一溪雲水，天際絕人行，高吟處，依稀灞橋鄰里，更  
翦翦梅花，落雲階月砌。化工真解事，強勾引老來詩思。  
楚天暮驛，使不來，悵曲闌獨倚。

前調

九日有懷  
楊守齋

周密

江籬搖落江楓冷  
霜空鴈程初到萬景正悲秋  
奈曲終人杳登臨嗟老矣  
問今古清愁多少一夢東園十年心事恍然驚覺  
腸斷紫霞深知音遠寂寂怨琴淒調短  
髮已無多怕西風吹帽黃花空自好  
問誰識對花懷抱  
楚山遠九辨難招更曉煙殘照

前調

聽表伯  
長琴

張炎

秋風吹碎江南樹  
石牀自聽流水別鶴不歸來  
引悲風

千里餘音猶在耳有誰識醉翁深意去國情懷草枯沙  
遠尚鳴山鬼客裏可消憂人間世寥寥幾年無此杏  
老古壇荒把淒涼空指心塵聊更洗傍何處竹邊松底  
共良夜白月紛紛領一天清氣

前調

答仇山村寄

張炎

可憐張緒門前柳相看頓非年少三徑已荒涼更如今  
懷抱薄遊渾未減滿煙水東風殘照古調誰彈古音誰  
賞歲華空老京洛染緇塵悠悠意獨對南山一笑只

在此山中甚相逢不早瘦吟心共苦知幾度翦燈牕小  
何時更聽雨巴山賦草池春曉

聲聲慢

宋蔣捷賦秋聲俱用聲字收韻調名  
本此雙調九十五字聲作勝者誤

聲聲慢

周密

燕泥沾粉魚浪吹香芳堤十里新晴靜惹游絲花邊裊  
裊扶春多憐漂泊記章臺曾挽青青堪愛處是撲簾嬌  
嫩隨馬輕盈長是河橋三月做一番晴雪惱亂詩魂

帶雨沾衣羅襟點點離痕休綴潘郎鬢影怕綠牕年少  
人驚卷春去翦東風千縷碎雲

鹽隴四犯

雙調九  
十五字

鹽隴四犯

劉基


白露點珠明河生浪秋光看一半翠衾知夜永夢冷孤  
館南樓數聲過雁西池桂花零亂歲序如何江山若此  
贏得霜鬢滿 傷心慢回愁眼見蛩吟蔓草螢度荒曠



淚隨黃葉下事逐浮雲散  
滄波滾滾東流去問誰是登樓  
王粲菊綻籬邊賦歸來恐晚



御選歷代詩餘卷五十九



總校官庶吉士 臣張能照

校對官庶吉士 臣陳文樞

膳錄監生 臣周學澐

財團  
人  
佛  
陀  
教  
育  
基  
金  
會  
釋  
淨  
空  
敬  
啟

